




إحصاءة في القلب

توفيق الحكيم

رخصة في القلب

تأليف
توفيق الحكيم



رصاصة في القلب

توفيق الحكيم

الناشر مؤسسة هنداوي

المشهرة برقم ١٠٥٨٥٩٧٠ بتاريخ ٢٦ / ١ / ٢٠١٧

يورك هاوس، شبيث ستريت، وندسور، SL4 1DD، المملكة المتحدة

تليفون: ٨٣٢٥٢٢ ١٧٥٣ (٠) ٤٤ +

البريد الإلكتروني: hindawi@hindawi.org

الموقع الإلكتروني: https://www.hindawi.org

إن مؤسسة هنداوي غير مسئولة عن آراء المؤلف وأفكاره، وإنما يعبر الكتاب عن آراء مؤلفه.

تصميم الغلاف: ولاء الشاهد

الترقيم الدولي: ٩٧٨ ١ ٥٢٧٣ ٣٢٨٧ ٤

صدر هذا الكتاب عام ١٩٣١.

صدرت هذه النسخة عن مؤسسة هنداوي عام ٢٠٢٣.

جميع حقوق النشر الخاصة بتصميم هذا الكتاب وتصميم الغلاف محفوظة لمؤسسة هنداوي.
جميع حقوق النشر الخاصة بنص العمل الأصلي محفوظة لأسرة السيد الأستاذ توفيق الحكيم.

المحتويات

٧

٣١

٥١

الفصل الأول

الفصل الثاني

الفصل الثالث

الفصل الأول

(عيادة طبيب. مكتب الدكتور. حجرة لها بابان. الدكتور سامي يخلع على عجل المعطف الأبيض، ويرتب هندامه الخارجي بعناية بعد أن ينظر في ساعة ذهبية في معصمه. ويتأهب للخروج ... جرس التليفون يدق فوق المكتب.)

سامي (يجري على صوت جرس التليفون): ألو ... أنا الدكتور سامي نفسه، مين؟ ... أهلاً وسهلاً ... حاضر يا فندم ... عنوان البيت شارع القصر العيني ... بعد ساعة أكون عندكم ... قبل كده مشغول ... بس خليه ياخد مسهل. (يفتح أحد البابين ليخرج وهو يصفر بفمه مبتهجاً؛ فيصطدم بشخص حسن الهندام، داخلًا في هياج واضطراب) بسم الله الرحمن الرحيم! ... جرى إيه؟ ... ما لك يا نجيب؟

نجيب (وهو يلهث، يرتمي على أقرب مقعد): اسكت ... أنا توفيت!
سامي: حد قابلك من أيّاهم ... قلت لك ألف مرة اقصر الشر وابعد عن الشوارع اللي بيطلعوا لك فيها أصحاب الديون بالنهار!

نجيب (في صوتٍ مُتداعٍ وهو مُغمض العينين): مش ديون.
سامي: أمال إيه الحكاية ... ما لك؟ ما تضيعش وقتي ... أنا لازم أقابل خطيبتي حالا ... (ينظر في ساعته).

نجيب: ابعت حالا هات لي واحد حكيم.
سامي: وأنا يعني أمال هنا طرطور؟
نجيب (ممدداً على المقعد): آه ياني ... رححت خلاص مأسوفاً على شبابي!
سامي: اسمع يا نجيب ... إن كان غرضك تتسلط على علشان عايز لك ريال أو نص ريال قل لي بلاش ضياع وقت.

نجيب: مش مسألة فلوس ... بقول لحضرتك أنا ميّت ... هوّ يعني علشان ما اكون ميّت لازم يدفنوني في قرافة المجاورين؟

سامي: والكلام المفيد دلوقت إيه بقا؟

نجيب: الكلام المفيد، أنّي دلوقت مضروب بالرصاص.

سامي: (في استغراب): رصاص؟

نجيب: انضربت بالرصاص قدام «جروبي»

سامي: يا خبر! ... بتقول إيه؟ ... جدّ يا نجيب؟ ... وساكت ليه من الصبح؟ ... فين؟ ... (ينادي) يا عوضين! ... التمرجي مش هنا ... انت لازم لك إسعاف حالاً.

نجيب: أيوه اسعفني.

سامي: (يدنو منه ويخلع ملابسه): اكشف الجرح بسرعة ... دخلت فين الرصاصه؟

نجيب: (يشير إلى قلبه): هنا!

سامي: (في دهشة): مش ممكن!

نجيب: (يشير إلى قلبه بشدة): بقول لك هنا.

سامي: مش معقول ... انت يظهر ما عندكش فكرة عن الطب بالمره.

نجيب: ما ليش دعوة بالطب ... أنا بصفتي مضروب رصاصه أقول لك انها واقفه هنا ... وانت حر، تصدّق والّا ما تصدّقش.

سامي: دا القلب يا مغفل ... رصاصه في القلب ولسه عايش؟ ... انت عايز تطيّر من عقلي حبه الطب اللي باكل بهم عيش!

نجيب: ومين قال لك اني لسه عايش؟

سامي: بتقول إيه؟

نجيب: بلغ عن وفاتي حالاً بصفتك حكيم!

سامي: لازم الرصاصه دخلت في عقلك!

نجيب: الرصاصه هنا في القلب.

سامي: (يجس نبض نجيب): مفيش حاجة أبداً عندك ... نقطة دم مفيش ... النبض طبيعي ... القلب سليم.

نجيب: القلب سليم ... سليم يا جاهل ... افحصني كويس ... انت شايفني نجيب بتاع الصبح؟ ... أنا شخص آخر يا سامي، من مدة ٧ دقائق ... أنا في عالم آخر من مدة ٧ دقائق.

سامي (ينظر إلى نجيب لحظة): انت بتحب!

نجيب: لأول مرة في حياتي.

سامي: كل نوبة تقول دي أول مرة في حياتك.

نجيب: أبدًا ... المرة دي بس ... لأن الرصاصة هنا.

سامي: رصاصة إيه!

نجيب: عينها يا سامي! ... نظره واحدة مافيش غيرها! ... عينينا تقابلت عفواً!

خلاص ... شعرت في الحال بحاجة دخلت هنا ... (يشير إلى قلبه) ولا طلعتش ... لسه

موجودة ... هات إيدك (يمسك يد سامي) شوف ... جس.

سامي (يجذب يده): مين دي؟ ... ما عرفتهاش؟

نجيب: أبدًا ... كانت راكبة أتوموبيل طول الأودة دي مرة ونص ... وواقفة قدام

جروبي تاكل «جلاس».

سامي: وانت كنت فين؟

نجيب: كنت باخد واحد ويسكي على البار ... واحد بس «أبيرتيف» مفيش غيره ...

وأنا خارج، لقيت عينها في عيني، راح قلبي عامل كده ... (يقبض يده) وراح ساقط تحت

رجلي، واتدحرج في الشارع على الأسفلت.

سامي: لغاية ما وقع في بلّاعة! عامل كده ... (يقبض يده) وراح.

نجيب: ما أعرفش راح فين.

سامي: وبعدين؟

نجيب: وبعدين شفتها نزلت، ومشيت في شارع المناخ، في اتجاه الأوبرا.

سامي: مشيت وراها طبعًا.

نجيب: انت مجنون! وأنا أقدر امشي في شارع المناخ؟ عايز يقفشوني قدامها، وأبات

الليلة في القسم؟

سامي: أيوه صحيح ... دا من الشوارع الممنوعة ... مش واخد بالي ... لك فيه على

الأقل زباين من أيّاهم ... كوستا الترتزي، وشالوم الجزمجي، وماريو الحلاق.

نجيب (في حق): مسألة الشوارع دي بقت حاجة تجنّن ... أروح فين يا ناس؟ مفيش

شوارع كفاية في مصر ... إن ما كنش مصلحة التنظيم تفتح حالاً شوارع جديدة، والّا

يعملوا مترو تحت الأرض، أو ترمواي في السما ... اللهم أنا خلاص، ما ليش عيش في البلد.

سامي (باسمًا): أنت ممنوع من المرور في كام شارع؟

نجيب (ناظرًا في أجدته): أقول لك يا سيدي: خد عندك، المدايح لغاية النص، وقصر النيل بعد سليمان باشا، والمناخ جزء منه، وبعض شارع فؤاد، وشارع كوبري قصر النيل ... وأما الضواحي، فصاحب الملك ساكن في الزيتون.

سامي: وأخيرًا عملت إيه في حكايتك؟ طارت منك.
نجيب: طبعًا.

سامي: والنتيجة؟

نجيب: النتيجة؟ مفيش نتيجة، غير اني دلوقت محسوب في عداد الأموات، وشوف لي طريقة: لأن المسألة جد مش لعب.

سامي: أشوف لك طريقة ازاي؟ ما سألتش مين دي؟ بنت مين؟
نجيب: أبدًا ... أبدًا.

سامي: ما شفتش نمرة الأوتوموبيل كام؟
نجيب: أبدًا ... أبدًا.

سامي: طيب تعرف ماركتة إيه الأوتوموبيل، على الأقل؟
نجيب: أبدًا ... أبدًا ... ما أخذتش بالي ... هو أنا كنت فاضي أشوف ماركة الأوتوموبيل، والّا ماركة وشها.

سامي: وما خدتش تاكسي ورحت وراها تشوف ساكنة فين؟
نجيب: أبدًا ... أبدًا.

سامي: اديني عقلك! عايزني أعمل لك إيه بقا بذمتك؟ كل حاجة أبدًا ... شارلوك هولمز أنا والّا شمهورش؟ والّا عايزني أضرب لك الرمل!
نجيب: انت مستحيل تعرف الحب ... آدي كل اللي أقدر أقوله بالاختصار لواحد مغفل زيّك.

سامي: أشكرك ... أورفوار ... (يتحرّك للخروج).

نجيب: اسمع ... أنا لأول مرة في حياتي اتلخمت ... وبقيت واقف تايه مش حاسس بالدنيا ... وفجأة طلعت أجري حاطط إيدي هنا ... (يشير إلى قلبه) زي واحد مضروب عيار ناري ... لغاية وما وصلت عيادتك ... تسمّي ده إيه؟

سامي: أسميّه مرستان!

نجيب: الحب الحقيقي ... اللي ما يحصلش إلا مرة واحدة في الحياة!

سامي: عندها أتومبيل طول الأوده دي مرة ونص تمام ... أهو ده الحب الحقيقي ... هسبانو ... ريزوتا ... فراسكيني ... باكار ... ماركة من دول تفتح لك جميع الشوارع الممنوعة، ولا تحتاجش لمصلحة التنظيم.

نجيب (يبصق في الأرض ازدراء): أنت رجل مائدي!
سامي: اسمع يا نجيب نصيحة: أنا أشجّعك انك تغوى العربيات الي طول الأوده دي مرة ونص ... مالتك تنتظم، وتعيش مرتاح.
نجيب: أنا أحقر الكلام الي بتقوله ده.

سامي: انت حر.
نجيب: وأحقر الفلوس.
سامي: طيب ... أوفوار ... (يتحرك).
نجيب: رايع فين؟

سامي: رايع لخطيتي في أمر مهم ... وراجع بعد ربع ساعة ... لأن عندي عيَّانين.
نجيب (يتمدد كالمريض): أنا عيان.
سامي: انت قاعد هنا ... أنا رايع بقى ... (يتَّجه إلى الباب).
نجيب: رايع فين؟

سامي: مش ضروري أقول لك ألف مرة أنا رايع فين؛ لأن عقل حضرتك تايه النهارده!
نجيب: عندي هبوط في القلب.
سامي: أحسن ... نهارك سعيد ... (يحاول الخروج).
نجيب (ينهض على قدميه بسرعة ويصيح به): اقف عندك ... رايع فين؟ أنا باقول لك عندي هبوط في القلب يا ابن الكلب ... ومضروب بالرصاص، وحالتي خطيرة.
سامي: برده حانرج للرصاص؟!

نجيب (في صوت قاصف): شوف لي دوا في الحال لهبوط القلب، وإلاّ وشرفك أطرباً العيادة عليك وعلى العيَّانين.

سامي: بقا دا صوت واحد عنده هبوط في القلب؟!
نجيب (ينزل صوته بسرعة إلى طبقة منخفضة): انت يا سامي يا خويه، عندك دوا عجيب ضد هبوط القلب.
سامي: إيه هو؟

نجيب (يترنم): ورقة بجنيه يا عزيزي، جنيه مصري، وآلاّ إنجليزي، ينحط كده في الجيب، يجمّد القلب ويطيّب.

سامي (ينظر إليه شزراً لحظة): بقا اسمع ... يعني يصح تضيّع من وقتي ربع ساعة، في اختراع الحكاية الطويلة العريضة دي، علشان كده؟! **نجيب** (يمدّ يده): لا أبداً ... مسألة الحب حقيقية، ولا شك فيها، وبكره تشوف ... أما الجنيه، فده من زمان موصوف لي في الحالات الخطرة الي زي دي! **سامي** (يخرج محفظة نقوده): وشرفك أنا لازم أعزلّ حالاً من شقتي الي في قصر النيل ... دا مين يسكن في عمارة ساكن فيها انت. **نجيب** (يخطف ورقة بجنيه من يد سامي): هات الله لا يحرمك مني ... ابق ضيف على الحساب!

سامي (في تهكّم): حساب؟ نهارك سعيد ... (يخرج). **نجيب** (يضع الورقة في جيبه بعناية): سعيد مبارك يا افندم ... (ثم يرتّب هندامه) دلوقت بقا، حيث إننا اطمأنينا على مستقبلنا الباهر، لمدة ٢٤ ساعة ... يجب البحث عن صاحبتنا الي عندها ماركة (بروننج) ... (يخرج علبة سجائر ويتناول سيجارة).
(الباب الآخر للحجرة يطرق.)

نجيب: مين؟ (الطرق يعود فيشتد) اسكت يا عيان، الدكتور جاي حالاً ...
(الطرق يشتد.)

سيدة (من الخارج تصيح): أدخل وألاً لأ.
نجيب (في غير اكتراث): لأ.
السيدة (من الخارج): ليه ما أدخلش؟
نجيب: كده
السيدة (صائحة): لازم ادخل!
نجيب (وهو يشعل سيجارته): ادخلي ...

(الباب الأيمن يفتح وتظهر (فيفي) غادة مصرية أرستقراطية، رشيقة جميلة، ذات أعين فتاكة، وبمجرد أن يراها نجيب يبيغت وبيبهت، وتسقط منه سيجارته من فمه.)

فيفي: فين الدكتور؟ (تبحث بعينها في أنحاء القاعة).

(نجيب بلا حراك.)

فيفي (تتأمل جموده في دهشة): الدكتور فين؟

نجيب: ...

فيفي: الدكتور مش هنا من فضلك؟

نجيب (كأنما كان يخاطب نفسه): مش ممكن ... (ثم يصحو لنفسه ويلتفت بسرعة

إلى فيفي) أفندم.

فيفي: فين هو؟

نجيب: هو مين؟

فيفي (في شيء من الصبر النافذ والحدة): الدكتور سامي طبعاً!

نجيب: أه ... طبعاً ... ما تأخذنيش ... أنا ...

فيفي (صائحة في ضيق عصبي فجائي): الدكتور سامي.

نجيب (في الحال وقد خاف من صيحتها العصبية الفجائية): ما اعرفوش.

فيفي (صائحة في ضيق عصبي كذلك كالمرّة السابقة): انت في عيادته هنا، ما تعرفوش

إزاي؟

نجيب (في خوف كذلك كالمرّة السابقة): طيب أعرفه!

فيفي (تتأمل لحظة من رأسه لقدمه، كمن حسبته مخبولاً): يعني حضرتك ما

تقدرش تقول لي، إذا كان الدكتور موجود وألا مش موجود؟

نجيب: أقدر أقول لحضرتك.

فيفي (في تهكم): امتي ان شاء الله؟

نجيب: حالاً إن شاء الله ... بس ...

فيفي: بس إيه؟

نجيب: حلم حضرتك عليّ شويّة.

فيفي (تنظر إليه في استغراب وضيق): أنا منتظرة.

نجيب (يتمالك): أيوه يا افندم ... حضرتك منتظرة ... مين؟

فيفي (تنظر إليه نظرة نافذ الصبر، الذي يحلم لآخر مرة): منتظرة أعرف الدكتور

سامي هنا وألا لأ؟

نجيب (كمن يُففق): آه. الدكتور سامي ... آه ... يعني الدكتور سامي؟ أيوه يا افندم
أقدر أقول لحضرتك ...

فيفي: أظن المسألة مش محتاجة للوقت ده كله، علشان تقول لي هنا وألا مش هنا.
نجيب: تحبّي أكون صريح شويّة؟
فيفي: تفضّل.

نجيب: أنا محتاج خمس دقائق علشان أرجع لحالتي الطبيعية.
فيفي (تنظر إليه لحظة): يعني دلوقت بأيّ حال، ما تقدّرش تجاوبني؟
نجيب: مستحيل أقدر أجاب حضرتك على أي سؤال بالشكل ده.
فيفي: بالشكل ده ازّاي؟

نجيب: ولو فيها رزالة، غمّضي عينيك شويّة.
فيفي (تنظر إليه شزراً): يعني إيه؟
نجيب: يعني اعملي كده. (يغمض عينيه).
فيفي: مش فاهمة.

نجيب: لأ؛ لازم تفهمي من فضلك.
فيفي: أفهم إيه؟

نجيب: تفهمي إن البروننج فيه ست رصاصات بس ... وانطلقوا كلّهم خلاص، أكثر
من كده يبقى متروليوز ... وروحي راحت من أوّل رخصة ... وإذا كنت سيادتك فاهمة
انّي بسبع أرواح، أو انّي معجون بالأسمنت المسلّح، يبقى ظلم ... وانت ما يخلّصكيش ...
وألا أنا غلطان في الكلام ده؟

(لحظة صمت.)

فيفي (تنظر إليه من رأسه لقدمه كالمرتاب في عقله):. أنا كنت فاكدة الدكتور سامي
حكيم باطني بس!

نجيب (فاهماً قصدها): قصد حضرتك إيه بقا؟
فيفي: ولا حاجة ... أنا ما قلتش حاجة زيادة عن كده.
نجيب: أولاً أنا مش عيّان.
فيفي: طبعا مش ببطنك.
نجيب: يعني سيادتك عايزة تقولي عيّان بحاجة تانية؟

فيفي: أنا مش عايزة أقول حاجة أبدًا ... ولا فيش داعي لكده بالمره، لأنني مش جاية هنا دلوقت، علشان أقول لك انت عيَّان بيايه.

نجيب: أمال حضرتك جاية هنا علشان إيه؟

فيفي: جاية بالطبع لشيء ثاني ... أقابل الدكتور سامي.

نجيب: لأسباب صحية طبعا؟

فيفي: أيوه ... وكمان علشان ... أولاً ... اسمح لي أعرف ... حضرتك مين هنا؟

نجيب: حضرتي مين هنا؟

فيفي: أيوه لو تسمح لي أعرف.

نجيب: حاضر ... أقول ل حضرتك حالاً.

فيفي: تفضل ... منتظر إيه؟

نجيب: (يخرج علبة سجايه ويقدمها إلى فيفي): سيجارة؟

فيفي: (بلا حراك): مersi ... ما ادخنش.

نجيب: برافو ... عملت طيب قوي ... أنا ما أحبش السِّت الي تدخن.

(يتناول سيجارة ويضعها في فمه.)

فيفي: أنا كمان ما أحبش الراجل الي يدخن.

(نجيب في حركة غريزية ينزع في الحال السيجارة من فمه ويلقي بها في الأرض.)

فيفي: (في تهكُّم خفي): لأ مفيش لزوم ... اشرب سيجارتك أحسن!

نجيب: (في قوة): لأ ... مش ممكن ... أنا مجنون؟! خلاص من اللحظة دي بطَّلت

السجائر ... أنا مستعد أتعهد لك وأقسم لك بشرفي وحياة ...

فيفي: (في برود): وإيه الداعي؟ دا شيء ما يهمّنيش.

نجيب: (مصدوماً): ما يهمّكيش انني أبطل السجائر؟

فيفي: بالتأكيد لأ ... يهمّني في إيه؟

نجيب: مش لما أبطل السجائر صحتي تتحسن؟

فيفي: وأنا ما لي؟ دا شيء يهمّك انت.

نجيب: يهمّني أنا بس؟ ما يهمّش حد ثاني أبداً؟

فيفي: ما اعرفش ... انت بالطبع أدري بظروفك.

نجيب: إن كان على ظري، تأكدي أنّها ألّعن ظروف خلقها ربّنا. أولاً أنا مقطوع من شجرة ولا فيش حد يهتم إن كنت أدخن وألا انحرق ... ثانياً، أنا ساكن لوحدي في (أبّارتمان) في شارع قصر النيل ... ومحمد السُّفَرجي سابني امبارح وطفش ... والدي الله يرحمه ويحسن إليه، وكذلك والدي الله يرحمها ويحسن إليها، كانوا الاثنين من خيار الناس، كان عندهم ...

فيفي (تقاطعته وتلفتت جهة الباب): مع الأسف: عوضين التمرجي مش هنا علشان أسأله عن الدكتور سامي!

نجيب (مصدوماً): حضرتك متضايقه للدرجة دي من كلامي؟
فيفي (في تردّد): لأ ... إنّما بس انا شايفة الوقت غير مناسب علشان تحكي لي تاريخ حياتك.

نجيب: وإمتى أمّال تشوفي الوقت مناسب، علشان أبقى أحكي لك تاريخ حياتي بالتفصيل؟

فيفي: وإيه الضّرورة أنّك تحكي لي تاريخ حياتك، بتفصيل أو من غير تفصيل؟

نجيب: مفيش ضرورة أبداً؟

فيفي: بالتأكيد مفيش أبداً.

نجيب: إيه السبب؟

فيفي: طبعا ... أولاً أنا ... ما تأخذنيش ... ما اعرفكش.

نجيب (مصدوماً): أشكرك.

فيفي: لأ ... ما تشكرنيش ... دي الحقيقة.

نجيب: صحيح دي الحقيقة ... لكن ...

فيفي: لكن إيه؟

نجيب: لكن برده ما كنتش أحب انك انت الي تذكّرني بها.

فيفي: أنا مضطّرة.

نجيب (يطرق في شبه إزعان وألم): طيّب.

فيفي (تنظر إليه في صمت ثم تقول): انت مع ذلك لغاية دلوقت ما فهِمّتيش

حضرتك مين هنا؟

نجيب (في كآبة): وإيه الفائدة؟!

فيفي: بس أحب أعرف أنا بكلم مين.

نجيب: بتكلمي مين؟ بتكلمي شخص مخلوق جديد لنج، من مدة ١٠ دقائق ... ما لوش مستقبل ... مالوش غير حاضر جميل، يدوم كمان بالكثير ٥ دقائق.

فيفي: مش فاهمة كلامك.

نجيب: أحسن.

فيفي: بدّي أعرف بس انت صفتك إيه في العيادة؟

نجيب: ما ليش صفة.

فيفي: انت لك صلة بالدكتور سامي؟

نجيب: صاحبي.

فيفي: حكيم زيّه طبعا؟

نجيب (شارداً): طبعا.

فيفي (باسمة): الطيور على أشكالها تقع.

نجيب (كمن يخاطب نفسه): صحيح أنا وقعت.

فيفي: بالتأكيد.

نجيب (يرفع رأسه ويلتفت إليها فجأةً): إيش عرّفك؟

فيفي: أنا أعرف أنّك ما وقعتش على الدكتور سامي هنا، إلّا النهارده، لأنّي سبق جيت له كتير في الوقت ده.

نجيب: سبق جيتي كتير هنا قبل النهارده؟ وأنا كنت ساعتها في انهي داهية؟

فيفي: ما اعرفش.

نجيب (صائحا): اسمحي لي أقول لك اني أنا إنسان يستحق الضرب بعشرين أو خمسة وعشرين صرمة نضيفة!

فيفي: ما اقدرش اقول لك بالضبط انت تستحق كام ... لكن كل اللي أقدر أقوله انك

بتضيّع وقتي بشكل غريب ... المهم في كل اللي فات، الدكتور سامي هنا والّا مش هنا؟

نجيب (مصدوم منفعل): الدكتور سامي مش موجود ... دا كل اللي أقدر أقوله ...

وعشان ما اضيّعش وقت حضرتك بشكل غريب، أقول لك أوقفو، أو ... آديو (يتحرّك).

فيفي: فيه عيّانين برة منتظرين الدكتور ... مين رايح يشوفهم؟

نجيب: ما اعرفش.

فيفي: الدكتور سامي ما قالش مين يشوف العيّانين؟

نجيب: مفيش هنا عيَّانين.

فيفي: فيه.

نجيب: مفيش.

فيفي: فيه.

نجيب: مفيش.

فيفي: بقول لك فيه برّة في الصالة، وفي أودة الانتظار.

نجيب: بقول لك مفيش هنا عيَّانين.

فيفي: طيب روح شوف بعينك برّة!

نجيب: أنا ما أكذبش نفسي وأصدّق عيني ... مفيش في العيادة، بل في العالم كلّ،

دلوقت، غير شخص واحد بس اقدر أترف بصحيح انه عيَّان.

فيفي: مين هوّ؟

نجيب: المخلوق الي واقف قدامك.

فيفي: انت بتقول انك حكيم مش عيَّان.

نجيب: عيان.

فيفي: مش باين عليك.

نجيب: هوّ يعني علشان ما اكون عيَّان لازم يشيلوني على نقالة!

فيفي: وعيَّان بإيه؟

نجيب: وأنا مجنون اقول لك أنا عيَّان بإيه، وحاسس بإيه؟ مستحيل أقول، ولو

شنقوني.

فيفي: ليه بقا؟

نجيب: كده ... ما أقولش أبداً.

(لحظة صمت.)

فيفي (تنظر إليه قليلاً): أحسن ... برده ما تقولش.

نجيب: أنا نفسي ما يمكنش أقول.

فيفي: أيوه ما تقولش.

نجيب: ما أقولش أبداً.

فيفي: أيوه كده.

نجيب: أيوه.

فيفي: نرجع للموضوع ... الدكتور سامي ما قالش حايرجع هنا إمتى؟

نجيب: أوكد لك لو قلت لك أنا عيَّان بيايه، مستحيل تصدَّقِي.

فيفي: قلت لك خلاص ما تقولش ... انتهيينا.

نجيب: علشان كده ما يمكنش أقول.

فيفي: ما تقولش.

نجيب: أيوه ما أقولش.

فيفي: أيوه كده.

نجيب: أيوه.

فيفي: إذا كان الدكتور سامي مش راجع دلوقت، أقدر أسيب له كلمة (فجأة تضع يدها على خرسها متألمة) آه.

نجيب (في لهفة): ما لك؟

فيفي (تخرج منديلها وتضعه على فمها): سنَّتِي.

نجيب (في اهتمام وقلق): بتوجعك؟

فيفي: قوي.

نجيب (يهزول في الحجرة كأنه يبحث عن شيء): فين؟ فين؟!

فيفي: بتبحث عن إيه هناك؟ سنَّتِي هنا (تشير إلى فمها).

نجيب: أيوه فاهم ... أنا ببحت عن الدَّوا ... فين الدَّوا ... أولاً إيه هوَّ الدوا بالضبط؟

على كل حال أنا لازم أشوف لك طريقة ... لأنني مقدرش أشوفك متألمة من أي شيء ... فين التمرجي؟ فين الدكتور؟ انت لازم لك واحد دكتور حالاً.

فيفي: انت مش بتقول انك دكتور؟

نجيب: آه ... أيوه برضه ... لكن حتى على فرض أنني دكتور، ما اقدرش أعالجك

انت.

فيفي: ليه؟

نجيب: مقدرش أقول لك ليه ... المهم دلوقت، إيه اللي في إمكاني أعمله علشانك؟!

سنَّتْكَ بتوجعك قوي؟

فيفي: أيوه ... دلوقت بس وجعتني مش عارفة ليه؟

نجيب: ورّيني، افتحي بّق ... فين السّنة دي؟ (تفتح فمها فتظهر أسنانها) أوّا ده
ضرس مش سنة ... علشان تصدّقي انّي دكتور ... ثانياً فين هيّ الأسنان؟ أنا مش شايف
غير صفّين لولي من الغالي! انت يلزمك واحد جواهرجي، مش واحد حكيم.
فيفي: لأ ... أرجوك ... ضرسي بيوجعني ... شوف لي أي علاج حالاً.

نجيب: علاج زي إيه؟

فيفي: مش أنا طبعاّ الي أقول لك.

نجيب: أصل أنا بس مش حكيم أسنان.

فيفي: أمال حكيم إيه؟

نجيب (في تردد): حكيم ... (ينظر إلى عينيها الساحرتين) عيون ... أيوه أنا حكيم
عيون ... لأنّي أفهم في العيون ... ودرست العيون ... وقاسيت من العيون.
فيفي: لكن احنا دلوقت في الأسنان ... والي بيوجعني ضرسي.

نجيب: تأكّدي ان ضرسك عزيز عليّ قوي ... لكن بقى مع الأسف.

فيفي: اسمع يا دكتور ... أنا أعرف ان الألم دايمًا جاي من عصب الضّرْس؛ لما الواحد
ياكل حاجة مثلجة ... ولذلك أي مسكّن بسيط.

نجيب (بسرعة): أيوه مسكّن ... عليك نور ... أهو ده الدّوا اللازم، بس كان تايه عن
بالي ... إنّما بقى المسكّن ده، يعني الواحد يتعاطاه سفوف، والأ معلقة شوربة قبل الأكل،
والأ إيه؟

فيفي (تنظر إليه ملياً): يظهر أنّك مش دكتور أبداً.

نجيب: دكتور في العيون بس يا افندم.

فيفي: ولا حتّى في العيون.

نجيب: الله يسامحك ... المهم عندي ان ألك يزول بأي طريقة ... أنا مصرّح لك:
اشتميني ... اضربيني ... أنا أفتكر ان أحسن مسكّن هو انك تشغلي نفسك عن الألم
ببهدلتي ولعن أبو خاشمي ... أظن دي أحسن طريقة.

فيفي: لكن ده مش علاج طبّي.

نجيب: مش ضروري العلاج يكون طبّي ... مش أنا حكيم ... لكن أوّكد لك ان البلاوي
التقيلة، ما تجيش إلا من تحت راس الحكما.

فيفي (في سخرية): انت حكيم مدهش!

نجيب: جايز ... إنّما الأصح أنّي بني آدم متألم دلوقت بشكل مدهش.

فيفي: مش باين عليك أبداً.
نجيب: ما هو برده، ده من سوء حظي.
فيفي: ومع ذلك كونك انت كمان متألم، دا شيء ما يهمني.ش.
نجيب: وانت إيه الي بيهمك؟!
فيفي: المهم عندي حاجة تسكّن ضرسِي.
نجيب: ضرسك لسه بيوجعك؟
فيفي: أيوه.
نجيب: خالص؟
فيفي: خالص.
نجيب: أحسن.
فيفي: ازاي أحسن؟
نجيب: علشان تاني مرة تحرّمي الوقوف قدام جروبي تاكلي (جلاس) ... توجعي
ضرسك وتموّتي الناس!
فيفي (في دهشة): وعرفت ازاي اني أكلت جلّاس قدام جروبي؟
نجيب: حاجة بسيطة.
فيفي: لازم شفتني قبل دلوقت بشويّة.
نجيب: لأ.
فيفي: أمال عرفت ازاي؟
نجيب: ما تعرفيش اني أقدر اقرا كل شيء في فكرك، وفي ضميرك، وفي قلبك؟
فيفي: حكيم روحاني حضرتك؟
نجيب: بالضبط!
فيفي (في تهكّم): أظن زي ما انت حكيم عيون؟
نجيب: أحسن شويّة.
فيفي: طيّب اقرا الي في ضميري.
نجيب (يقف وقفة صناعية وينظر إليها ملياً ثم يتنحّن): في ضميرك إنّي شخص
ضيّع وقتك بشكل غريب.
فيفي: كذاب.
نجيب (في فرح): صحيح؟

فيفي: ما تسألنيش. العالم الرُّوحاني الحقيقي، ما يسألش الزبون.
نجيب: بدِّي أطمئن.

فيفي: مش من وظيفتك انك انت الي تطمئن، يا حضرة الساحر العجيب؟
نجيب: أوكد لك إنك ألطف إنسانة شفتها.

فيفي: أنا مش عاوزه تقرا الي في ضميرك انت!
نجيب: عندك حق ... الي في ضميري أنا مفهوم طبعا ... وسحرك انت بس الي قدر
يكشف ضميري.

فيفي: احنا في سحرك انت!

نجيب (فرحاً): وأنا لي سحر؟!

فيفي: انت الي بتقول.

نجيب (متذكراً): آه.

فيفي: قرئت إيه كمان في فكري؟

نجيب (ناظرًا إليها ملياً): انت مدهشة!

فيفي: دا شيء مش في فكري طبعا.

نجيب: انت مش بسيطة أبداً.

فيفي: ومين بسيط في الزمن ده؟

نجيب: أنا بقرا في قلبك كلام يخوف.

فيفي: يخوف ليه؟ ويخوف مين؟

نجيب: يخوفني.

فيفي: يخوفك انت؟ انت كل حاجة تحشر نفسك فيها؛ حتى قلبي؟

نجيب: يا ريت أقدر أنحشر في قلبك.

فيفي (تبتسم): إيه بقى الي خوفاك؟

نجيب: أولاً بصيت في قلبك لقيته فاضي، أفضى من جيب نجيب من قبل عشر دقائق!
فيفي: كذاب.

نجيب: ازاي؟! قلبك مش فاضي؟

فيفي: لأ.

نجيب: مشغول؟

فيفي: طبعا.

نجيب (في فرح): كويس ... تسمح لي بقا أسألك سؤال واحد؟
فيفي (في تقطيب): أنا عارفة السؤال الواحد ده، وما أسمحش به أبدًا.
نجيب: لأ ... اعملي معروف، أنا محسوبك، متجيش لغاية النقطة الحساسة وتعاكسيني ... كلمة واحدة يتوقّف عليها مستقبل حياتي.

فيفي: كلمة إيه؟

نجيب: مين هو؟ ... مين هو السعيد اللي ...؟
فيفي: مستحيل ... يظهر اني تساهلت معك في الكلام أكثر من اللازم ... عاوز كمان تعرف أسرارِي الخصوصية؟!

نجيب: وما له؟ انت أولاً أجمل وأذكى وأشجع آنسة مصرية عرفتھا.

فيفي: مش عاوزة تقريظ من فضلك.

نجيب: تقريظ؟ دي حقائق، أنا عاوز أقول لك انك زي ما ظهر لي، واحدة مش بسيطة من بتوع زمان ... انت واحدة فاهمة كل شيء في الدنيا ... تعليم، وتهذيب، وذكاء ... بالطبع دي أكبر قوّة وأعظم سلاح في يد السّت، تقدر تعيش به في وسط العفاريّت ... إيه اللي يهم واحدة زيّك دلوقت، انها تكون صريحة مع واحد زيّي؟!

فيفي: ما تبلفنّيش من فضلك.

نجيب: مش بلف أبدًا والله.

فيفي: عاوزني أكون صريحة في إيه؟

نجيب: أولاً، أنا مش عاوز أعرف إنت مين ... ولا ماركة أتموبيلك إيه، ولا ساكنة

فين!

فيفي: أمال عاوز إيه؟

نجيب: عاوز أعرف بكل صراحة ... فاهمة؟ بكل صراحة، مين هو المخلوق اللي شاغل

قلبك؟

فيفي: واحد من الناس.

نجيب: مفهوم، قصدي مين هو يعني؟

فيفي: وإيه يهَمَّك إن كان زيد والّا عمرو؟

نجيب (في تردّد): هو موجود؟

فيفي: طبعا على قيد الحياة.

نجيب (متردّدًا): لأ ... قصدي موجود ... هنا؟

فيفي: أيوه ... موجود في مصر.
نجيب (خائفاً): قصدي، كمان، يعني ... بس جاوبيني بالصّراحة ... فاهمة؟ بكل
صراحة هو موجود هنا في الأودة دي، والأ لا؟
فيفي (مندهشة): سؤال غريب؟
نجيب: عاوز الصراحة ... هو موجود قدامك دلوقت، والأ لا؟!
فيفي: طبعا لأ.
نجيب (يحاول الهدوء): آه.
فيفي (تلاحظ تغييره): ما لك؟
نجيب: لأ ... مفيش حاجة أبداً ... يعني قصدك انه واحد تاني ... مش موجود هنا؟
فيفي: طبعا.
نجيب (يطرق): آه.
فيفي (تتنظر إليه): زعلت؟
نجيب (يرفع رأسه): لأ ... ما فيش زعل أبداً.
فيفي: أظن أنا جاوبتك بصراحة، زي انت ما طلبت تمام؟
نجيب (في إطراق): أيوه ... تمام ... مرسى.
فيفي: أقدر أقول لك كمان، إذا كنت عاوز إيضاح أكثر من كده، إنه خطيبي.
نجيب: مش مهم.
فيفي: وإنه حكيم زيّك، لكن يمكن يعرف صنعته أحسن منك شويّة.
نجيب: طبعا.
فيفي: أقدر أقول لك، إنك يمكن تعرفه.
نجيب: جايّز.
فيفي: وإنه ربّما يكون صاحبك.
نجيب: زي بعضه.
فيفي: تستعلم عن حاجة تانية كمان؟
نجيب: لأ ... خلاص متشكّر ... ده كل اللي أنا كنت عاوز أعرفه ... نهارك سعيد.
(يَنحني ويتناول سيجارته التي ألقاها على الأرض، ويمسحها في كمّه، ويضعها
في فمه ... صمت طويل.)

نجيب: نهارك سعيد. (يتَّجه إلى الباب ليخرج).
فيفي (تنظر إليه باسمة، وعندئذ تتحرَّك نحو الباب الآخر): يا عوضين! (تخرج).

(نجيب لا يزال يفكّر.)

سامي (داخلاً من الباب الواقف أمامه نجيب): انت لسه هنا ... لسه هنا ومعك
جنه! مارحتش ليه تبحث عن صاحبك.

(نجيب ينظر إليه ولا يجيب.)

سامي (يترك نجيب ويهرع باحثاً): فيفي ... (لنجيب) فيفي خطيبتى هنا. ما
شفتهاش؟

فيفي (تدخل): سامي!

سامي: أنا يظهر رحت لك من هنا، وانت جيتي من هنا ... تعالى أولاً، لما أقدم لك
نجيب صاحبي وصديقي وجاري في السَّكن (يقدم أحدهما للآخر).

فيفي (بتهكُّم): تشرفنا.

نجيب (لا يجسر على النظر إليها): تشرفنا يا افندم.

فيفي: حضرته طبعاً حكيم زيَّك يا سامي.

سامي: أبداً ... ده موظف مهم.

فيفي (لنجيب في تهكُّم): كده؟!

سامي: وفضلاً عن ذلك، معروف في كل مكان، انه من أطرف شخصيات البلد، ما
يغرِّكيش إنه واقف كده مبلم، زي الي خطفوا محفظته ... ده بس علشان حصلت له

حادثة من مدة نصف ساعة.

فيفي: حادثة إيه لا سمح الله؟

سامي: شاف واحدة في أتومبيل قدام جروبي بتاكل جلاس ...

نجيب (بسرعة): قصدي حادثة أتومبيل ... كان حايجصل تصادم.

سامي: بلاش كذب يا نجيب.

فيفي: وجرى إيه؟

سامي: ما فيش تصادم ولا حاجة ... الحكاية كلها إنه بيحب.

نجيب (في حيرة): كلام إيه ده يا سامي؟

سامي: فيفي «سبور» ما تخفش ... هو الحب عيب؟ مش كده يا فيفي؟ بدليل اننا حبيينا بعض.

فيفي: طبعا يا سامي.

نجيب (يدير وجهه ويتحرّك): نهاركم سعيد!

سامي: الله ... انتظر ... قل لنا نويت على إيه ... احنا لازم نساعدك ونشوف لك طريقة ... ما دمت أوّل ما شفتها اتلخمت، وغرقت في شبر ميّه، ولا عرفتش هي مين ولا ساكنة فين؟ فأظن مش لطيفة إنّا نسيبك كده وحلان لشوشتك.

نجيب: أرجوك يا سامي تريّح نفسك من جهتي!

سامي: إنت مكسوف تقول انك بتحب؟

نجيب: وبعدين معاك؟!

سامي: انت مش قايل لي أبلغ عن وفاتك؛ لأن عينها قتلتك ومُت خلاص، وانضربت بالرصاص، ولا تقدرش تعيش من غيرها ... حصل وألا ماحصلش؟

فيفي: للدرجة دي؟

نجيب: كلام.

فيفي: طبعا كلام!

نجيب: والدليل على كده، إني عايش أهوه كويّس، بصحة جيدة أربعة وعشرين قيراط.

فيفي: دا من حسن الحظ.

سامي (وهو يخلع جاكته ويرتدي معطف العمل): ما تصدّقيش! شوفي وشه أصفر ازّاي؟ أنا أراهن إن ما كان وزنه نزل النص.

نجيب (صائحا): يا سيدي ما لكش دعوى بوزني اعمل معروف! انت حد مسلطك عليّ النهارده؟!

سامي: شوف انت بقيت عصبي ازّاي؟ ما يصحّش توصل حالتك للدرجة دي وأسيبك.

نجيب: وعاوز منّي إيه بقا انت دلوقت؟

سامي: أشوف لك طريقة حالا ... أنا كنت الأول مستعجل، ودلوقت فضيت لك ...

اسمع: أحسن حل انك تروح (جروبي) وتسال ...

نجيب: أسأل عن إيه؟

سامي: عن الست صاحبة الأتومبيل الفخم الي كانت بتاكل جلاس، يمكن تكون معروفة هناك.

نجيب: طيب وان عرفتھا یجری إیہ فی الدنیا؟ إیہ الی راح یتغیر فی حیاتی؟
سامي: إیہ التغفیل ده؟ إن عرفتھا تبقی خلاص المسألة انحلت، تبقی نجحت یا عزیزي واهنیک، واستحق منك الحلاوة. مش كده والّا إیہ یا فیفی؟
فیفی (باسمة): بالتأكید!

نجيب (خافتاً وهو ينظر إليها): شيء غريب!
سامي: يَلله طيران على جروبي ... ما تضيّعش دقيقة واحدة!
نجيب (يتحرّك): حاضر ... نهاركم سعيد.
سامي (بسرعة): انتظر يا نجيب (يدنو منه ويهمس إليه) ... اسمع ... انت مش لازم لك كمان فلوس؟
نجيب: لأ.

سامي: عجيبة! لأول مرة في حياتك، الفلوس مش لازماك!
نجيب (يخرج الجنيه من جيبه): خد ... ده كمان مش لازمني.
سامي (في دهشة): مش ممكن!
نجيب (يعطيه الجنيه): لأول مرة في حياتي أسلف فلوس!
سامي: قصدك ... ترد السلف.
نجيب: الاثنين واحد، نهارك سعيد.
سامي: اسمع ... ورايح تقابلها ازّاي، وانت ما معكش فلوس.
نجيب (صائحاً): أقابل مين؟ مين هيّ الي أقابلها؟ ما تقولش الكلام ده بقا، أحسن ما يحصلكش طيب ... أنا مش مقابل حد أبداً ... سبني اعمل معروف بقا، خَلّيني أروح لأشغالي ... أنا واحد عندي شغل في الوزارة ... وانت النهارده ضيّعت وقتي النفيس!
سامي: وقتك النفيس (يلتفت إلى فيفي) بقول لك أصبح عصبي ... ما كانش كده أبداً.

فیفی (لنجيب في تهكّم خفي): اشرب فنجان ينسون دافي يا نجيب بك!
نجيب (ينحني): أشكرک!
سامي: صحيح ... الينسون الدافي ده مدهش.
نجيب: حاضر! حاشرب ينسون دافي.

فيفي: وحمّام سخن قبل النوم.

نجيب: حاضر.

سامي: صحيح الحمّام السُّخن قبل النوم مدهش.

نجيب: آخذ حمّام سخن!

فيفي: وخذ بعد كده ...

نجيب: إيّه تاني ... دُش بارد كمان؟! اعملوا معروف كفاية ... اسمحوا لي أروح

لحالي.

فيفي: «الباكار» بتاعتي تحت، تقدر توصّلك.

نجيب: ممنون ... أنا ما اركبش لا باكار ولا دوكار.

سامي: سيبه يمشي على رجليه ... ودا وش نعمة؟

فيفي: علشان أظن البك مستعجل ... احنا يظهر ضيّعنا وقتك النفيس يا نجيب

بك؟!

نجيب: بشكل غريب!

سامي (يلتفت إليه مقطّبًا): ارّاي؟

نجيب (صائحًا منفجرًا): أقسم بالله العظيم، لو تكلمت كلمة زيادة، لأطرباً عليك

العيادة، وزى ما ترسى ... أنا لا قابلت ست في جروبي بتاكل جلاس، ولا يسم هاري ...

والحكاية ملفّقة من أولها لآخرها، علشان ألطش منك جنيه ... ولو أسمعك تجيب لي سيرة

الست دي مرة ثانية، أنا أضربك بالرصاص!

سامي: الرصاص إيّاه الي انضربت به النهارده؟!

نجيب: أنا بالكلمك جد ... وانت الجاني على نفسك.

سامي: انت جرى لك إيّه يا نجيب؟

نجيب: أنا متأسّف ألكمك باللهجة دي قدام الست ... لكن أنا مضطر (لفيفي) ما

تأخذنيش!

فيفي (باسمة): خد راحتك في الكلام.

سامي: معذور! أنا مش قادر أفهم يا نجيب، ارّاي تيّس للدرجة دي؟ احنا نبحت

لك عنها يا سيدي من تحت الأرض ... بس اهدأ وروّق دمك، وكن مطمئن ... دي مسألة في

غاية البساطة ... أنا أتعهّد لك وأكون مسئول.

نجيب: أصل المصيبة انك ما بتفهمش عربي أبدًا ... دماغك متركبة شمال ... أعمل لك إيه؟ الأمر وما فيه يا سيدنا الأفندي، ان حكاية ما لهاش أساس بالمرّة. فهمت كلامي؟ يعني لا كان فيه ست، ولا جلاس، ولا أتوموبيل.

سامي: مفهوم ... لأنك ضيّعت ده كلّ بلخمتك.

نجيب: ما فيش فايده!

سامي: لأنك انت لما تحب.

نجيب (مقاطعًا): قلت لحضرتك ما فيش حب!

سامي: كده؟!

نجيب: تصدّق ما تصدّق انت حر ... أولًا، أنا ما أقدرش أدخل جروبي، لأن مرسيل اللي واقف على البار، له في ذمّتي ٢٠ جنيه، من حساب وغيره.

سامي: حتّى البارمان اللي واقف على البار؟ والله انت لو دخلوك الجنة، برده تستلف من سيّدنا رضوان، اللي واقف على الباب!

نجيب: ما حدّش له بيّ شأن.

فيفي: طبعا ما لناش شأن أبدًا.

نجيب: على كل حال ... يكون في معلومكم، اني ما أحبّست الست اللي كانت بتاكل جلاس قدّام جروبي ... ما احبّهاش ... أنا حر ... ما احبّهاش أبدًا ... حد شريكي؟ بالعكس ... أنا أكرهها دلوقت، زي ما اكره فاتورة الحساب! فاهمين ... ما احبّهاش ... ما احبّهاش.

سامي: أقطع دراعي ان ما كان ده هوّ الحب.

فيفي (ضاحكة وتقول بصوت خافت): مسكين يا نجيب!

الفصل الثاني

(الشقة التي يسكنها نجيب بشارع قصر النيل: صالون بسيط حسن الذوق ... باب في الصدر، وباب في الجهة اليمنى صغير، وباب بلكون في الجهة اليسرى ... منضدة كبيرة على شكل صندوق، في وسط الصالون ... وعليها غطاء؛ فلا يدرك الرائي لأول وهلة أنها صندوق ... تليفون على منضدة أخرى صغيرة، وجراموفون على منضدة ثالثة، كذلك مرآة في الحائط.)

(نجيب أمام المرآة، بالقميص والبنطلون، يربط الكرافتة ... يدق جرس باب الشقة ... فينتفض نجيب، ويسرع إلى وسط الصالون ... جرس الخطر! يتجه إلى المنضدة التي كالصندوق، ويرفع غطاءها؛ فيفتح الصندوق فيدخل فيه ويتمدد، ويغلق عليه الغطاء ... وعندئذ يدخل عبد الله من باب الصدر.)

عبد الله (في يده ورقة): سي نجيب بك! يا سي نجيب بك ... اظهر جنابك وبان وعليك الأمان! مفيش حد من أيّاهم ... دا أنا عبد الله البوّاب.

نجيب (يرفع الغطاء ويظهر من الصندوق، ويظل لحظة يرمي عبد الله بنظرات شزراء، ثم ينفجر): انت مش عبد الله البوّاب، انت عبد الله الجحش ... حضرتك مش ناوي تبطل اللعب في جرس الخطر؟

عبد الله: نسيت.

نجيب: يعجبك كده تخلي دمي يهرب من غير مناسبة؟

عبد الله: حصل خير.

نجيب (يرتمي على المقعد): إجري بقى شوف لي كبّاية لمون بالتلج.

عبد الله: وفين هو اللمون والتلج؟

نجيب: تصرّف يا أخي ... بس شاطر تعرّ مزاجي ... شيء يجنّ.

عبد الله: هات جنابك قرش نشترى به.

نجيب: بتقول إيه؟

عبد الله: قرش.

نجيب: اسحب كلمتك بسرعة.

عبد الله: ما فيش حد دلوقت راضي يبيع لنا شك.

نجيب: طيّب خلاص اسكت ... صرفنا نظر ... لكن الحق مش عليك، الحق عليّ أنا اللي أسكن في عمارة، فيها بواب نتن زي حضرتك ... طول عمر البوابين تسلف السكان، وانت مش راضي تطلّع من جيبك قرش واحد، نجيب به ثلج.

عبد الله: تصدّق بالله يا سي نجيب بك؟

نجيب: مصدّق بالله انك بارد.

عبد الله: أبداً ... وشرفك لو تعرف العذر ... دا أنا مخصوص طالع لجنايبك علشان أطلب.

نجيب: لأ ... إقصر الشر ... تطلب إيه؟ انت انهبلت؟ اسكت بقا خلاص ... لا تطلب منّي ولا أطلب منك ... خلّينا كده حافظين مراكزنا.

عبد الله: أنا على كل حال ما أنساش فضلك عليّ.

نجيب: أيوه كده اتصلّح اعمل معروف.

(يتناول الجاكّة من على مقعد ويلبسها.)

عبد الله: بس ...

نجيب (يقاطعه): لأ ... في عرضك، مافيش بس! ما تبقاش زي القطط، تاكل وتنكر ... انت لسّه امبارح، واصلك منّي نص ريال.

عبد الله: خلّهم النهارده ريال.

نجيب: وأجيب لك منين؟ هو انت ربّنا مشيّع دلوقت؛ علشان تتسبّب في نكدي؟

عبد الله: دا أنا يا بيه، حاش عكّ بلاوي كتير.

نجيب: طيّب، ما تحوش نفسك عنيّ شوية دلوقت.

عبد الله: والله، إن ما كنت أنا موجود تحت، لكان أصحاب الديون طلّعوا هربدوا البيت ... ولا كان نفع فيهم جرس خطر، ولا صندوق، ولا أي حيلة من حيلنا دي! دا وكيل

الفصل الثاني

صاحب الملك، كل يوم والثاني عايز يقابلك؛ علشان أجرة الشقة المتأخرة، وأنا أوزعه وأقل له انك مسافر ... وكل ما حد غريب يسأل عن حضرتك، أقول له مش موجود ... آمال فكر جنابك، أنا قاعد تحت أقشر بصل؟

نجيب: كل ده كويس ... لكن بقا.

عبد الله: لكن كله من قلّة البخت.

نجيب: انت لآخر قليل البخت؟

عبد الله: ربنا أعلم بحالي.

نجيب: علشان عاوز نص ريال؟

عبد الله: نص ريال ... ربع ريال ... اللي يطلع من ذمتك.

نجيب: انت فاهم ذمتي دي جراب، أطلعّ منه انصاص ريالات، وأرباع ريالات؟

عبد الله: بقى ما فيش النهارده جبر خاطر؟

نجيب: ربنا أعلم بحالي.

عبد الله: النهارده أول الشهر.

نجيب: أول الشهر كان الصبح.

عبد الله: ودلوقت؟

نجيب: دلوقت اسمه آخر الشهر.

عبد الله: كده بالعجل؟

نجيب: النتيجة الرسمية بتاعتي كده ... أول الشهر يبتدي من الساعة ٩ صباحاً

لغاية ١١ والدقيقة ٤٥ ... يعني على ما يضرب مدفع الظهر، أكون شطّبت طبعاً ... إنت فاكّر إيه؟ احنا ما عندناش فلوس تبات لتاني يوم.

عبد الله: على كده، جنابك رايح تعمل إيه في دي؟ (يقدم الورقة التي معه)

نجيب: إيه دي؟

عبد الله: فاتورة حساب.

نجيب: هس! ما تسمّعنيش كلمة حساب ... إياك تنطق بالكلمة دي في بيتي ... أنا

مؤمن على حياتي ضد الكلمة دي.

عبد الله: دا خريستو البقال.

نجيب: ما اعرفوش.

عبد الله: عاوز يقبض.

نجيب: قل له بلاش عبط.

عبد الله: له ٦٥٠ قرش استجرار الشهر الي فات ... منهم ٣٠٠ قرش سلفه نقدية، و ٢٠٠ قرش باقي الشهر الي قبله، و ١٥٠ قرش.

نجيب: اسكت اعمل معروف ... ما فيش فايده ... ربنا خلق ليّ طبل ودان، ما يلقطش الحساب.

عبد الله: الخواجة حلف ما يشكك حضرتك.

نجيب: حلف بيايه؟

عبد الله: حلف بدينه قدام بوابين الحتّة.

نجيب: إنه ما يشككنيش؟

عبد الله: أبداً.

نجيب (يغني): قال إيه حلف ما يشككنيش ... قال إيه حلف ... (فجأة ينفجر في غضب) أقسم بالله الذي خلق السلف نعمة للناس، اني لا أتعامل مع الوغد خرستو ده، لا شك ولا نقدية ... خلاص ... مبسوط؟

عبد الله: ونجيب لوازنا منين؟

نجيب: شوف بقال تاني ... هوّ بقى ما فيش في مصر غير خريستو؟

عبد الله: مافيش غيره ... كافة بقالين الحتّة عرفتنا ... بقى لنا سنة، كل شهرين نغير بقال.

نجيب: بقى احنا خلصنا بقالين قصر النيل كلهم؟

عبد الله: خلصناهم كلهم. ودوبناهم في عرق العافية.

نجيب: ما فيش بقال فتح جديد؟

عبد الله: أبداً ... أنا واخد بالي طيب، من كل دكان يفتح جديد.

نجيب: شيء يجنن! والعمل بقى دلوقت؟

عبد الله: أحسن طريقة تدفع لخرستو قرشين من أصل المطلوب، ونرجع له.

نجيب: نرجع له ... مش ممكن ... أنا حلفت خلاص ... ما يمكنش.

عبد الله: خرستو برده مهاود، ابن حلال، أحسن من غيره.

نجيب: انت مجنون ... مستحيل ... وقع مني يمين.

عبد الله: إن الله غفور رحيم.

نجيب: حتّى اليمين نقعد نبعزق فيه؟

الفصل الثاني

عبد الله: معلش ... برده أحسن من البهدلة، نراضيه ونرجع له.
نجيب: إنا لله وإنا لحريستو راجعون.
عبد الله: ندفع له النهارده ٢٠٠ قرش.
نجيب: ٢٠٠ إيه؟
عبد الله: إن ما كانش النهارده، يكون بكرة؟
نجيب: وان ماكانش بكرة؟
عبد الله: يكون بعده.
نجيب: دا كلام جميل ... لما انت تعرف تسمّني الكلام الحلو ده، ساكت ليه من الصبح؟ سبحان الله! انزل بقى، خلّيني آخذ خمس دقائق استراحة.
عبد الله (في تردّد): فيه موضوع ثاني.
نجيب: موضوع مفرح من فضلك؟
عبد الله: مفرح قوي.
نجيب: خير ... قل بسرعة.
عبد الله: الرُّبُع ريال لازمني ضروري.
نجيب (ناظرًا شزرًا): دا الموضوع المفرح قوي؟
عبد الله: ما هو أصل أنا كنت الأول، طالب من جنابك نص ريال، لكن بقى ...
نجيب: لكن بقى مراعاة للحالة الحاضرة، وعملت لي تنزيل ٥٠ في الميَّة ... مفهوم.
عبد الله: أنا قلبي دايمًا على جنابك.
نجيب: أشكرك على إحساساتك.
عبد الله (يشير إلى جاكّة نجيب): اهرش جنابك في جيب الجاكّة.
نجيب (ينهض ويخلع جاكّته، ويقذف بها إليه): خد اهرش فيها بمعرفتك.
عبد الله (يتلقّاها ويبحث في جيوبها جميعها): الي ما فيها برغوت نقدية!
نجيب (جالسًا): علشان تصدّق.
عبد الله (ينظر إليه في ارتياب): أمّاَل جنابك نازل برّه دلوقت ازاّي؟
نجيب: ومين قال لك انّي نازل؟
عبد الله: جنابك مش نازل النهارده؟
نجيب: أنزل ازاّي؟ عينيك كلّها نظر.
عبد الله: يعني جنابك حاتفضل محبوس هنا؟

نجيب: قسمتي.

عبد الله: لحد إمتي؟

نجيب: لحد ما تسلفني انت ربع ريال.

عبد الله: كويس! لأ مش ضروري بقى نزول جنابك ... اقعد لحد ما يفرجها الكريم
من ناحية ثانية (جرس التليفون يدق) إياك ده الفرج.
نجيب (بلا حراك): عشم إبليس في الجنة.

عبد الله: مين عارف؟

نجيب: مش منظور ان مدير البنك الأهلي يطلبني في التليفون؛ علشان يقول لي أمرنا
لك بخمسين جنيه! على كل حال، روح انت شوف مين.
عبد الله (يتجه إلى التليفون): يا سيدنا الحسين.
نجيب: إن كان واحد من أيّاهم، ارمي السماعة على طول!
عبد الله

نجيب (يرفع السماعة): آلو ... آلو ... مين؟ نجيب بك ... حاضر (يلتفت إلى نجيب)
دي واحدة ست عاوزه حاضرتك.

نجيب (ينتفض): ست ... (ينهض ويهرع إلى التليفون) آلو ... أفندم ... آه ... هو
انت يا سوسو؟ ... نعم ... عاوزه إيه؟ ما بظهرش؟ طبعا فيه سبب مهم ... لأ مش زعلان
منك ... أنا زعلان من نفسي ... لأ مش نازل النهارده ... لأنني منحاش ... منحاش في البيت
... اللي حايشني؟ سبب مهم ... (يبعد فمه عن البوق، ويخاطب عبد الله) أقول لها على
السبب يا سي عبد الله (يعود إلى التليفون) لأ ما أقدرش النهارده ... متأسف ... أوقفار ...
(يضع السماعة، ويجلس وهو يقول لعبد الله) صدقت؟ قلت لك ده مش مدير البنك الأهلي،
تقول لي لأ ... ما فيش فائدة.

عبد الله (بعد لحظة صمت): بقى مافيش مع حضرتك ربع ريال؟

نجيب (في صبر عجيب): إن كان مع حضرتي ٣ صاغ كنت نزلت ... عاوز أفهمك أكثر
من كده؟

عبد الله (في لحظة تفكير): جنابك برده تقدر تجبر بخاطري.

نجيب (في اهتمام): أراي بقا يا شاطر؟

عبد الله: المطبخ فيه كروانة نحاس، تساوي لها نصف ريال.

نجيب: بس كده؟

عبد الله: وفيه كمان لحوق كويس، يجيب له ٧ قروش صاغ.

نجيب: كويس ... وانا أكل في إيه؟

عبد الله: في اللوكانده.

نجيب: يا سيدي ... يا سيدي!

عبد الله: محمد السفرجي طفش ... ومين الي رايح يطبخ لجنابك؟ مفيش غير اللوكانده.

نجيب (في تهكُّم خفيّ): الكونتنتال!

عبد الله: الي تستحسنها.

نجيب: تعجبنني!

عبد الله: وأكل اللوكانده على كل حال أحسن من تكلّيك محمد السفرجي، الي يقرف الكلب.

نجيب: طبعًا ... لكن بقى يا فصيح، اللوكانده دي بلاش، وآلا بفلوس؟

عبد الله: شكك لحد أول الشهر.

نجيب: يا مسكين يا أول الشهر ... أول الشهر ده لو كان جمل، كان زمانه وقع من طوله مغشيًا عليه!

عبد الله: وإيه الرأي بقى، يا سي نجيب بك؟

نجيب: الي تشوفه جنابك ... (جرس التليفون يدق).

عبد الله: التليفون!

نجيب: تعال شوف مين.

عبد الله (يمسك السماعة): آلو؟ واحدة ست برده.

نجيب: عاوزة إيه دي كمان؟ هات ورّيني (يأخذ السماعة) آلو ... مين ... حسنيّة؟

أفندم ... عاوزاني ضروري؟ مش ممكن ... ما اقدرش أنزل النهارده ... سبب مهم ...

منحاش ... أيوه منحاش ... برده لازم أجيك حالًا في تاكسي؟ طيّب انتظري على التليفون

لحظة (يلتفت إلى عبد الله) نصف ريال سلف يا عبد الله بك!

عبد الله: منين؟

نجيب: ابحث في أي حتّة ... لازمني ضروري ... اعمل معروف.

عبد الله: تعمل به إيه جنابك؟

نجيب: أجرة تاكسي يا مغفل.

عبد الله: أنا ورايا شغل مش فاضي ... (يتحرّك للانصراف).

نجيب (يبصق نحوه): ما أنا برده عارفك ندل خسع! (وفي الحال يتَّجه إلى البلكون في الجهة اليسرى، ويقف ببابه، ويرفع رأسه إلى أعلى ويصفر) يا مصطفى ... يا مصطفى ... سيدك سامي لسه مارجعش من العيادة؟ لسه؟ طيب احذف لي حالاً نص ريال وحياة أبوك ... ما فيش ازاي؟ نص ريال واحد لا غير يا دون ... ما تعطلنيش ... إخص على الي عملكم خدامين ... (يدخل يائساً) شيء يجنن (يمسك السماعة) آلو ... اسمعي يا حسنيّة ... مافيش فايده أبداً، تعالي انت بتاكسي ... مستحيل؟ طيب يا عزيزتي أوفوار ... (يضع السماعة في الحال).

عبد الله: خليك جنباك في بيتك ... برده أحسن!

نجيب (في نظرة شزراء): أحسن في إيه؟

عبد الله: جنباك كنت حاتدفع للتاكسي النص ريال، الي احنا لسه مش عارفين نعتز عليه!

نجيب: طيب اسكت ... مش عاوز منك كلام! قسماً بالله العظيم ماتنطق كلمة واحدة زيادة، إلّا أقوم أأكلك علقه تساوي ٣٠ قرش!

عبد الله: ٣٠ قرش! دي ولا أكلة الحاتي الكبابجي! طيب قابل، بس ادفعهم.

نجيب: تفضل انزل ... وخدها من قصيرها ... إلّا انا دلوقت العفارييت بتلعب قدّامي.

عبد الله: لأ ... ربنا يستر ... (يشير بالسلام ويخرج).

نجيب (يرتمي على المقعد): ما فيش نزول خلاص ... أنا لازم أعود نفسي على الوحدة، وأعمل زي غاندي، وأحتقر العالم كله، الي ماشي بالفلوس ... سوسو تحبني علشان الفلوس، حسنيّة عاوزاني بالفلوس ... آدي الحياة كلها ... فيها إيه غير كده؟ وكذاب الي يقول فيه حاجة اسمها عواطف، عند مخاليق الله المصنوعين من وحل وطن.

سامي (يدخل في اندفاع واهتمام): نجيب؟

نجيب: نعم ... ما لك عاوز إيه انت لآخر؟

سامي: أنا ... أنا.

نجيب: انطق آمال.

سامي: أنا وقعت من السما وانت تلقفتني.

نجيب: امتى ده؟

سامي: دلوقت.

نجيب: أبداً ... انت لو كنت وقعت دلوقت من السما، كنت سبتك تنكسر رقبتك.

سامي: ما ترضاش ... أنا عارف قلبك وأخلاقك.
نجيب: الغرض ... بالاختصار، انت عاوز إيه دلوقت؟
سامي: ما تكلّمنيش باللهجة دي يا نجيب، شجّعني شوية.
نجيب: أشجّعك يعني إيه؟ شجّع نفسك، وتكلّم انت، وقول الي عاوز تقوله.
سامي: أنا ... انت عارف أنني خاطب فيفي.
نجيب: عارف.
سامي: طبعاً ... لسه مش خطوبة رسمية لغاية دلوقت ... إنّما ...
نجيب: زي بعضه.
سامي: لأ ... مش زي بعضه.
نجيب: المهم انكم بتحبّوا بعض.
سامي: مش كفاية ... الخطوة المهمّة والعقبة الصّعبة أهلها ... فيفي أولاً، وارثة النهارده، ومتوفّر لها في المجلس الحسبي أكثر من ١٢ ألف جنيه ... وعائلتها كبيرة معروفة، وما اقدرش أقول لك ان كانوا يرضوا بواحد زيّي والأ لأ ... خصوصاً أنا سمعت ان أهلها مشترطين مهر لا يقل عن ٨٠٠ جنيه، وشبكة ٣٠٠ جنيه ... يعني واحدة زي دي تتكلّف لها حوالي ١١٠٠ جنيه.
نجيب: وما له ... انت لك في البنك مبلغ وقدره.
سامي: كل رصيدي ألف جنيه لا غير.
نجيب: نعمة من الله! فيه غيرك رصيده النهارده ما حصّلش ٣ قروش صاغ.
سامي: لاحظ ان ألف جنيه ما يعملوش حاجة يا نجيب.
نجيب (في تهكم): أبداً.
سامي: أنا باكلّمك جد ... انت أولاً، شفت فيفي ... بنت شيك صحيح ... الي زي دي لازم تعيش عيشة (لوكس)، انت شفتها والأ لأ، فيفي؟
نجيب (مطرقاً): أيوه.
سامي: إيه رأيك فيها بدمتك؟
نجيب (مطرقاً): كويّسة.
سامي (في تحمّس): مش كويّسة بس ... جنان.
نجيب (في صوت خافت): صحيح.
سامي: بشرفك لو كنت انت في مركزي، مش تعبدها؟

نجيب (يرفع رأسه): إيه لزوم السؤال ده؟

سامي: تعبدها والّا لأ؟

نجيب: ما أجابوش.

سامي: انت حر ... لكن أنا أقسم لك، ان فيفي مفيش زيبا اتنين في مصر.

نجيب (مطرقاً): ماحدّش قال انك كدّاب.

سامي: بنت (سبور)، مدهشة يا نجيب ... ساعات تسوق عربيّتها بنفسها ... عربية

(باكار) فخمة ... تصوّر امبارح بالليل، في شارع الهرم، كانت ماسكة الدركسيون بيد

واحدة، وإيدها الثانية على كتفي ... وماشين على ٨٠ كيلو.

نجيب (في مرارة): وتدوس الغلابة المساكين!

سامي: دي شاطرة ... ما تخافش عليها.

نجيب (في نفس المرارة): طبعاً ... الخوف على الي يمشي في سكّتها ...

(صمت).

سامي (بعد لحظة صمت وتأمل): أنا أحبّها قوي يا نجيب.

نجيب: وأنا كمان.

سامي (ينظر إليه): وانت كمان؟

نجيب: أيوه ... أنا كمان أشجّعك على ذلك.

سامي (في فرح): صحيح؟

نجيب: وهي تحبّك قوي يا سامي!

سامي: جدّاً.

نجيب: أنا ... أشجّعها على ذلك.

سامي: انت بتتكلّم جد؟

نجيب: مافيش داعي اني أهزّر.

سامي: تفتكر اني كُفء لها.

نجيب: بالتأكيد.

سامي: ما تنساش ان كل ثروتي، عبارة عن الألف جنيه الموضوعه في البنك.

نجيب: من ساعة هيّ ما حبتك، ارتفعت قيمتك، وبقيت تساوي ثقلك دهب.

سامي: إزّاي الكلام ده؟

الفصل الثاني

نجيب: من يوم أنا ما عرفت انها بتحبك، وانت متمتع بكامل احترامي! لأول مرة أشعر نحوك باحترام عميق!

سامي (في دهشة): للدرجة دي؟

نجيب: أمال إيه؟ انت نايم؟ فوق لنفسك كده، وافهم انك دلوقت حاجة تانية، يا ستين مغفل.

سامي: لأ ما تخفش ... أنا برضه فاهم، لو تكون من قسمتي، حانقلب حاجة تانية صحيح، وألعب بالذهب لعب؛ ١٠٠٠٠ جنيه نقدية في الزمن ده حاجة توهم ... غير العقارات ... علشان كده أنا بقول دي فرصة ... خايف تطير من يدي.

نجيب (يبصق): إخص! صحيح انك منحط! انت مش عارف أبداً تخليني احترمك خمس دقائق على بعض!

سامي: ليه؟ حصل مني إيه؟

نجيب: انت مش فاهم وبس ... مش ممكن واحد زيك يفهم.

سامي: إيه بس الي حصل؟

نجيب: حصل انك فاكرها ببيعة وشروة وأوكازيون، خايف يضيع منك ... برضه انت حكيم سوقي تجاري.

سامي: بقى اسمع يا نجيب، أنا مش جاي لك دلوقت علشان تهزأني.

نجيب: أمال جاي لي علشان إيه؟

سامي: جاي لك علشان تساعدني.

نجيب: أساعدك في إيه؟

سامي: تساعدني بكل قوتك ... وتنقذني بأي وسيلة؛ لأنني رايح اقع من السما وانت ...

نجيب: انتظر شوية من فضلك، قبل ما تقع من السما ... وضّح لي المسألة، علشان أشوف إن كنت أقدر استلقاك والأ ما اقدرش.

سامي: طبعاً المسألة واضحة ... أهلها يستحيل يتنازلوا عن أقل من ألف و ٢٠٠ ...

نجيب: وبعدين؟

سامي: وأنا مش عاوز أظهر بمظهر الضعف والفقر والاحتياج ... يعني لازم أدفع فوراً الي يقولوا عليه، من غير تردّد أو مماطلة.

نجيب: كويس.

سامي: وانت عارف ان الي معاي ألف بس ... يعني لازمني ٢٠٠ قول ١٠٠ علشان أهوّن عليك ... وأنا أبقي أتدبرّ في ال ١٠٠ الثانية.
نجيب: أنا مش فاهم.
سامي: بالاختصار أنا أرجوك تسلفني ١٠٠ جنيه دلوقت حالاً.
نجيب: دلوقت حالاً؟!
سامي: أيوه ... لأنني ناوي أقدم الشبكة والمهر وكل حاجة، بكرة قبل ما حد يعطلّ الشغلة.

نجيب: بقى انت جاي لي علشان أسلفك؟
سامي: حالاً.
نجيب: آه.
سامي: سكتّ ليه؟ بتبص لي كدا ليه؟
نجيب: أنا قاعد افكرّ مش لاقى.
سامي: الفلوس؟
نجيب: مش لاقى رد كافي شافي ينزّد به عليك.
سامي: ليه؟
نجيب: عاوز تستلف منّي ١٠٠ قرش؟
سامي: ١٠٠ جنيه.

(نجيب يضحك ثم يضحك.)

سامي: أنا مستعد اكتب لك بالمبلغ كمبيالة.

(نجيب يضحك ثم يضحك.)

سامي: بتضحك ليه بس؟ هو دا وقت ضحك يا نجيب؟
نجيب: أمّال امتى وقت الضحك؟ (ينهض ويصيح) أيتها السموات اضحكي ... أيتها الغرفة اضحكي ... أيها الصندوق اضحك ... أيها البوّاب عبد الله اطلع حالاً واضحك. (لسامي) واحد من أمرين، إمّا إنك تعبان شوية، ويستحسن اني أطلب لك إسعاف بالتليفون، ينقلك إلى مستشفى الأمراض العقلية، وإمّا اني أنا اللي تعبان شوية؛ لأنني أحترم على ١٠٠ جنيه نقدًا وعدًا بدون علمي، وقاعد منحاش في البيت مع إنني بأسلف الناس بكمبيالات.

الفصل الثاني

سامي: (يجذب نجيب من جاكته): أرجوك تقعد.

نجيب: سيبنّي أتكلّم وأقنع نفسي أولًا.

سامي: اقعد يا نجيب اعمل معروف.

نجيب: قعدت.

(يجلس.)

سامي: يظهر انك مش فاهم الموضوع.

نجيب: ده مؤكّد ... اني فهمت غلط خالص.

سامي: المسألة مسألة مستقبل ... ولذلك أنا أتوسّل إليك يا نجيب ... فاهم؟ أنا أتوسّل إليك.

نجيب: العفو ... علشان إيه بس؟

سامي: تشوف لي ١٠٠ جنيه.

نجيب: برده ... (صائحًا) يا راجل اعقل ... اعقل والّا أقسم بالله العظيم، أتكلّم بالتليفون ينقلوك في الحال! دا أنا لسّه يا بارد مافيش خمس دقايق، مصفّر لك في البلكون

علشان تحدف لي نص ريال ... تقوم تجيني دلوقت تطلب منّي ١٠٠ جنيه؟

سامي: انت يا نجيب شخصية معروفة، في جميع الأوساط والنوادي الكبيرة.

نجيب: (يلتفت إليه بسرعة): يعني إيه؟

سامي: يعني إنك شخص ما حدّش يرفض لك طلب.

نجيب: دا صحيح ... لكن قبل كل شيء، أنا شخص معروف عند النّاس كلّها، ان ليّ كرامة.

سامي: انت سالف من مارسيل البارمان ٢٠ جنيه.

نجيب: مارسيل وأمّثاله عارفين، طيّب، إن الـ ٢٠ جنيه يقبضوها منّي ٤٠، لمّا تيجي الفرص المناسبة ... ومن هنا لغاية ما تيجي الفرص المناسبة، ما أقدرش أظهر نفسي لجنس مخلوق.

سامي: يعني ما تقدرش تساعدني يا نجيب بأيّ طريقة؟

نجيب: في الحالة الراهنة لأ.

سامي: ما تقدرش تستلف لي من تحت الأرض؟

نجيب: لو كان تحت الأرض فيه ناس بتسلّف، ماكنتش انتظرت لمّا تفكّرني حضرتك.

سامي: أنا كنت أعتقد أنك تقدر.

(ينظر في الصالون)

نجيب: أرجوك ما تبصّش كثير لطقم الصالون ده؛ لأنه لسه مش مدفوع تمنه، ومنظور يتحجز عليه من يوم للتاني.

سامي: يعني مافيش فايدة منك؟

نجيب: عينك كلّها نظر.

سامي (في يأس): يا خسارة يا فيفي.

نجيب (بعد لحظة إطراق): طبعًا حاتزعل هيّ كمان؛ لو حصل مانع.

سامي: بالطبع.

نجيب: أيوه ... من غير شك.

سامي: أيوه.

نجيب: أيوه (لحظة) وانت ماتقدرش تصارحها بالمبلغ الي ممكن تدفعه؟

سامي: مستحيل ... أنا لازم أفهمها اني عريس كفاء متيسّر.

نجيب: وليه تغشّهم؟

سامي: الزواج كله كده دلوقت.

نجيب: أيوه (لحظة صمت وهو مطرق) المهم هو الحب.

سامي: علشان كده زواجنا لازم يتم؛ لأننا بنحب بعض.

نجيب (في صوت منخفض غريب): إن شاء الله يتم.

سامي (في أمل): أزاى؟ لقيت فكرة؟ الحقني اعمل معروف، أنا أبوس رجلك، انقذني.

نجيب: عندي فكرة واحدة ... (يفكّر).

سامي: قول أنا في عرضك.

نجيب (يفكّر): ما فيش غير ...

سامي (مهتمًا): غير إيه؟

نجيب: خاتم الملك.

سامي (ناهضاً): ونلقاه فين ده؟

نجيب: موجود ... (يفتح درجاً ويخرج خاتماً من الماس) خد.

سامي (يتناول الخاتم بتردد): لكن ...

نجيب: إيه؟ ما ينفعش؟

سامي: إديني عقلك ... ماينفعش ازاي؟ دي حاجة فخمة قوي ... الله يرحمها الست

صاحبة العصمة والدتك ... انت يظهر كنت ابن ناس طيبين في زمانك.

نجيب: هات بقى سيجارة وروح ارهنه، أو شوف لك فيه طريقة.

سامي (في تردد وهو يتأمل الخاتم): لكن لأ يا نجيب ... ما اقدرش! أنا بأي حق

اسمح لنفسي بالتصرف في تذكارات عائلتي زي ده؟

نجيب: مش مهم!

سامي: أنا أعتقد ان ده تهجم مني عليك، زيادة عن اللزوم، ولا أجروش اني أقبل

كرمك الغريزي المدهش ده.

نجيب: تجرأ واقبل، وروح بسرعة رتب أمورك.

سامي: على كل حال يا نجيب أنا ماقدرش أشكرك ... لأن عملك مش من الأعمال اللي

تشكر عليها بكلمة أو كلمتين ... وإن قلت لك مرسى أو متشكر؛ لعمل زي ده أبقى باري

... انت بالتأكيد أنبل وأكرم وأظرف وأشرف شخصية خلقها ربنا.

نجيب: رح بقى ما تبقاش ابن كلب رزل ... دوشنتني.

سامي: طيب أنا طالع بقى يا نجيب، أغسل وشي وأغير؛ لأنها جاية دلوقت، لأول مرة

تتفرج على الشقة ... أرفوار مؤقتاً!

نجيب: أرفوار.

سامي: بكرة أشوفك ضروري؛ علشان أقول لك انا عملت إيه ... (خارجاً).

نجيب (يصيح به): اسمع.

سامي (يلتفت إليه): نعم.

نجيب: معاك نص ريال سلف؟

سامي (في حركة حماسية يخرج محفظته): يا سلام يا نجيب ... خد المبلغ اللي انت

عاوزه ... جنيه ... خمسة ... عشرة.

نجيب: باقول لك نص ريال.

سامي: بس كده ... (يعطيه نص ريال).

نجيب: أيوه بس نص ريال ... افهم عربي ... مش طالب غيره ... هات كمان سيجارة ... ولّع لي ... بس روح بقى ابعد عني ... نهارك سعيد.

(سامي يخرج ... نجيب يظلّ وحده على مقعد مفكّرًا يدخن.)

(جرس الباب يرن.)

(نجيب ينهض بسرعة ... ثم يسرع إلى الطاولة ويدخل الصندوق.)

(فيفي تنقر على باب الصالون، وإذ تجده خاليًا تتقدّم في تردّد.)

(وتجلس على مقعد ثم تتلمل وتنادي.)

فيفي: مافيش حد هنا ... سامي.

(نجيب يرفع غطاء الصندوق أي المنضدة ويظهر رأسه.)

فيفي (تراه في الصندوق خارجًا فتصرخ في رعب): آه!

نجيب (خارجًا من الطاولة): لا مؤاخذه ... باردون.

فيفي: نجيب بك.

نجيب: أيوه ... أنا نجيب.

فيفي (ضاحكة ومشيرة إلى الصندوق): وعامل في نفسك كده ليه؟

نجيب: مش مهم ... أولاً أنا أحب أعرف سبب تشريفك هنا.

فيفي: وأنا أحب أعرف صفتك إيه هنا؟

نجيب: بقى حضرتك كل ما تقابليني في حتّة، تقولي لي صفتك إيه؟

فيفي: طبعًا ... أسألك عن صفتك هنا بالحالة دي.

نجيب: صفتي اني في محل سكني.

فيفي (في دهشة): دا محل سكنك ... أمال سامي فين؟

نجيب: شقّة سامي فوق ... حضرتك غلطّي في الدّور.

فيفي: آه ... صحيح ... باردون ... طيب أمّا أقوم اطلع بقى ... قبل كده مش تحب

تقول لي انت كنت مستخبّي ليه كدا؟

نجيب: احتياطياً بس ... علشان ما أقابلش بعض الناس غير المرغوب فيهم.

فيفي: زي مين؟

نجيب: ناس كتير يطول شرحهم.

فيفي: أنا منهم؟

نجيب: انت؟

فيفي: قول بصراحة.

نجيب: ما اقدرش أقول لك ... (فيفي تمتعض قليلاً لهذا الجواب).

فيفي: مرسى ... وعرفت أزاى اني جيت؟

نجيب: علشان ضربتي جرس الخطر.

فيفي: جرس الخطر دا إيه؟

نجيب: جرس الباب ... لأن كل واحد يضرب الجرس، معناه عندنا انه غريب عن البيت، أقوم أنا في الحالة دي أدخل الغوّاصة ... (يشير إلى المنضدة).

فيفي: (تنظر إلى المنضدة التي على شكل الصندوق): الغواصة! (تضحك).

نجيب: أمال ... احنا دلوقت في حالة حرب ... ودخول الغوّاصة ضروري؛ علشان لو دخل حد من الأعداء، يلاقي الشقّة ما فيهاش مخلوق، يقوم يتقهقر بانتظام.

فيفي: (باسمّة): والمعارف ... دول الحلفاء، طبعاً يدخلوا على طول، من غير ضرب الجرس.

نجيب: طبعاً ... ولذلك، الباب دايمًا مفتوح ... والحلفاء عندهم تنبيه بعدم ضرب الجرس.

فيفي: أنا متأسّفة الي أزعجتك، ودخلتك الغوّاصة من غير سبب ... ماكنتش أعرف ... على كل حال اعتبر انك كنت بتعمل مناورة ... انما اسمح لي أقول لك، ان دي طريقة غريبة! تفتكر ان فيه ناس كتير عاملين صناديق وغوّاصات زي دي؛ علشان ما يقابلوش حد؟

نجيب: ما أظنّش.

فيفي: اشمعنى بقى انت الي عجيب في أطوارك؟

نجيب: علشان ربنا خلقني كدا.

فيفي: أنا ملاحظّة ان أعصابك النهارده مرتاحة.

نجيب: الحمد لله.

فيفي: إنّما دا ما يمنعش انك تكره السّت الي كانت بتاكل جلاس عند جروبي، زي ما تكره فاتورة الحساب تمام ... مش كدا؟

نجيب: أرجوك ما تفكرّنيش بفواتير الحساب.
فيفي: ولا بالست الي انت تكرهها؟
نجيب: لاحظي سيادتك إن سامي منتظر فوق.
فيفي: أنا طالعة حالاً ... انت متضايق من وجودي؟
نجيب: أنا ما قلتش كدا.
فيفي: باين في عنيك انك متضايق.
نجيب: وهو كذلك.
فيفي: علشان كده أسيبك ... أوقفار.
نجيب: أوقفار.
فيفي: (تتحرك إلى الباب فتري الجرامفون في طريقها فتقف): دا الجرامفون بتاعك؟
عندك أسطوانات جديدة طبعاً ... على فكرة ... أمّا امبارح سمعنا في ميناهوس دور جديد في الجازباند، بديع قوي ... اسمه ... نسيت ... دلوقت أسأل لك سامي عن اسمه ... أنا امبارح سقت الباكار بنفسي.
نجيب: عارف ... في شارع الهرم ... الدركسيون بيد واحدة، سرعة ٨٠ كيلو.
فيفي: سامي قال لك.
نجيب: طبعاً.
فيفي: بقى سامي لازم يقول لك كده على كل شيء؟
نجيب: صاحبي.
فيفي: على فكرة ... إيه رأيك في سامي؟
نجيب: رأيي في سامي انه شاب مدهش.
فيفي: أنا مش شايفاه مدهشش في حاجة أبداً.
نجيب: أستغفر الله ... اسمحي لي أقول لك انك غلطانة قوي ... انت عاوزة أحسن من كده إيه في الدنيا؟ شاب لطيف ... حكيم كويس ... فلوس عنده في البنك ... ما لوش دايين بطالبه بقرش أو يزعه بقاتورة حساب ... وفضلاً عن كده ... بيحبك.
فيفي: بيحبني؟
نجيب: يعبدك.
فيفي: مين كمان غيره بيحبني؟
نجيب: ما فيش غيره.
فيفي: انت كذاب.

الفصل الثاني

نجيب: مش عاوزة تصدّقي ... انت حرّة.
فيفي: طيّب بص في وشّي ... حط عينك في عيني.
نجيب: لا لا لا ... اعملي معروف، ما فيش داعي أبداً اني أبص في وش حضرتك، ولا أخط عيني في عينك.
فيفي: شوف انت خفت من عيني ازّاي؟
نجيب: ما علّش.
فيفي: قل لي يا نجيب ...
نجيب: ما شاء الله.
فيفي: إيه؟
نجيب: نجيب كدا حاف! لا نجيب أفندي ... ولا نجيب بك ... ولا حتى سي نجيب ... حضرتك واخده راحتك معاية في الكلام زيادة عن اللزوم.
فيفي (في امتعاض): كدا؟
نجيب: انت مش ملاحظة؟
فيفي: كنت أفكر انك (سيور).
نجيب: الي قال لك كدا غشك.
فيفي: كنت أفكر ان لي الحق اعاملك من غير تكليف، بصفتك صاحب سامي الحميم ... ومع ذلك أنا حاخسر إيه؟ تحب أقول لك يا نجيب باشا؟
نجيب: أحب تقولي لي (جود باي) ... بس، وتسيبيني في حالي!
فيفي: إنت النهارده وحش صحيح.
نجيب: طول عمري كده ... (يتناول سماعة التليفون بسرعة) آلو ... مين ... سوسو ... اسمعي ... أنا لازم أقابلك النهارده ... وهو كذلك ... بعد عشر دقائق أكون عندك ... نروح فين؟ زيّ ما يعجبك انت، أورفوار مؤقتاً ... (يضع السماعة).
فيفي (في مرارة): دي واحدة ست.
نجيب: أظن كدا.
فيفي: أنا دلوقت فهمت.
نجيب: فهمت إيه؟
فيفي: فهمت انك نسيت بالعجل السّت بتاعة جروبي.
نجيب: الحمد لله الي فهمت كدا.

رصاصه في القلب

فيفي (تنصرف): نهارك سعيد.

نجيب (بلا حراك): نهارك سعيد ...

(فيفي تخرج ... ويبقى نجيب لحظة جامدًا، ثم يرتمي على مقعد، ويضع رأسه بين يديه).

الفصل الثالث

(عين منظر الفصل الثاني ... أي شقة نجيب ... نجيب واقف بقرب الجراموفون يسمع أسطوانة (La petite Tonkinoise) لجوزفين بيكر وهو يتحرك كأنه يرقص على أنغامها ... ولا تكاد الأسطوانة تصل إلى رُبعها حتى يدخل سامي.)

سامي (في اهتمام واندفاع): نجيب!

نجيب (يشير إلى الأسطوانة): هس! اسمع النغمة دي!

سامي: المسألة مهمة قوي ... فضك من البتاع ده دلوقت.

نجيب (يوقف الفونوغراف في ترمُّم): هه! ما لك بقى يا سيدي ... أدّوشت وقل مزاجي!

سامي: شوف يا نجيب ... المسألة اني أنا وقعت من السما.

نجيب: وانا تلقفتك ... ماعندكش شغل أبدًا غير انك تقع من السما؟

سامي: الحقيقة انهم مسألتين، مش مسألة!

نجيب: كمان؟!

سامي: أولاً، الخاتم الألباس بتاعك.

نجيب: ما له؟

سامي: راح.

نجيب: راح ازاي؟ يخرب بيتك.

سامي: راح من إيدك ... من إيدنا ... لأنني خلاص قدّمته شبكة ليفي! وانت إذا

كنت تحب، أكتب لك به كمبيالة، بأي مبلغ يعجبك، يدفع على أربع سنين، كان بها ... وإذا

كنت تحب تشنقني، اشنقني ... أنا بين إيديك، والي تعمله عمله!

نجيب: تذكّر أمّي يا جدع انت!

سامي: أنا غلطت وورّيته لفيّفي مسكت فيه ... اضطرّيت أقول لها انه الشبكة! ونسيت ساعتها انه تذكّار أمك ... (يستدرّك) والدتك! الحقيقة انه خاتم مدهش يا نجيب ... كلّ من شافه يستعجب! مافيش بضاعة زي دي دلوقت عند الجواهرجيّة!

نجيب: وأهلها قالوا إيه؟

سامي: فرحوا طبعًا ... وبقوا يورّوه لمعارفهم ... أنا قلت لهم تمنه ٦٠٠ جنيه.

نجيب: ده الي ينتظر منك.

سامي: أبدًا ... الواقع انه يساوي كده برده ... عند نجيب الجواهرجي خاتم ما يجيش ربعه، مكتوب عليه ٣٠٠ جنيه!

نجيب: انت لو كنت رهنته على ١٠٠ أو ٢٠٠ جنيه، ماكنتش حاتقدر تقدّم شبكة بالعظمة دي!

سامي: ما هو ده نفس الي أنا شفّته برده!

نجيب: احترموك طبعًا ... ورقبتك بقت أطول من الباب ده.

سامي: طبعًا.

نجيب: وخطيبك مبسوطة بالتأكيد.

سامي: فيّفي حاتطير به طيران ... لابساه في اصبعها، ودايره تفرجه للناس!

نجيب: (في صوت خافت): دا المهم!

سامي: (بعد لحظة في تردّد): لكن بس ...

نجيب: (يرفع رأسه نحوه): إيه بقى؟

سامي: (في تردّد): انت مش زعلان يا نجيب!

نجيب: علشان إيه؟

سامي: علشان الخاتم ضاع ... لأنه لو كان اترهن على أي مبلغ، كان برده على الأقل، فيه أمل انه يرجع لك في أي وقت! لكن دلوقت مافيش أمل أبدًا!

نجيب: طيبّ وعاوز منّي إيه بقى دلوقت؟

سامي: ولا حاجة ... انت الي عاوز منّي!

نجيب: عاوز منك إيه؟

سامي: من حقك انك تدرّيني، على الأقل، وتحتقرني؛ لأنّي زودّتها خالص!

نجيب: مش فاضي انا دلوقت أحتقرك.

سامي: سكوتك يا نجيب بيخوّفني.

نجيب: ما تخافش.

سامي: ضميري بيوبّخني.

نجيب: وأخرتها معاك بقي؟ انت عارف أنا ما ليش تقل على الفلسفة ... ضميرك يوبّخك، يهزّأك، يرقّعك بالصّرمة، أنا دخلي إيه؟!

سامي: طيّب.

نجيب: أدّي مسألة فاتت ... إيه بقي المسألة الثانية؟

سامي: المسألة الثانية.

نجيب: انطق.

سامي: كتب الكتاب.

نجيب: ما له.

سامي: كان غرضي يتّم في أقرب فرصة.

نجيب: وجرى إيه؟

سامي: فيفي مصهينة شوية، وقاعدة تماطل وتمطوح.

نجيب: وإيه السّبب؟

سامي: مش قادر أفهم.

نجيب: من امتى الكلام ده؟

سامي: أخيراً.

نجيب: طيّب، وانت مستعجل على إيه؟

سامي: ازّاي ... انت عبيط؟ لازم تنتهي بسرعة قبل ما يخلّصوا منّي القرشين (نجيب

ينظر إليه شزراً) بتبص لي كده ليه؟ مش عاجبك كلامي؟ أنا شايف اني باتكلّم بعقل.

نجيب: بعقل زيادة عن اللزوم.

سامي: أصل الموضوع ده بالذات عايز كده!

نجيب: بالعكس.

سامي: انت مش فاهم مركزي يا نجيب ... أنا أقل واحد تجرأ أنه يخطب فيفي! دي

تقدّموا لها أكبر ناس في مصر، ورفضتهم ... انت نايم؟ دي معروفة في البلد كلّها، انها

لقطة وحيدة، اللي ينولها كأنه نال.

نجيب (في تهكّم): البنك الأهلي؟

سامي: السعادة في الدارين!

نجيب: دا صحيح!

سامي: ولذلك أنا عايز أطمئن.

نجيب: طبعاً!

سامي: عايز أعمل كل جهدي، إن كتب الكتاب ينتهي في ظرف أسبوع.

نجيب: أسبوع؟! هوّ الزواج سلق بيض يا حضرة الأفندي، والأ هيّ العبارة نهب!

اهداً وابد وتمعّف شوية! انتم ليه كده ناس بطّالين شبّاحين! الدنيا بخير والله الحمد. ولا

حدّش بيموت من الجوع ... وانت عندك ألف مدعوق مصري في البنك!

سامي: يعني تفضّل اني أترك لهم حرية تحديد اليوم الي يعجبهم؟

نجيب: بالتأكيد!

سامي: فكرة ... برضه؛ علشان ما اظهرش قدّامهم بمظهر اللّحوح الملهوف!

نجيب: ما فيش عندك غير انك تظهر بالمظهر! ... برضه تفكيرك مش عاجبني أبداً!

سامي: ليه؟

نجيب: أنا والله خايف انك ما تستحقّش عروسة جميلة زي دي!

سامي (في قلق): أرّاي؟ لأ ... ما تخوّفنيش أمّال!

نجيب: ما عندكش عواطف أبداً.

سامي (يتنفّس الصّعداً): لأ ... عندي ... اطمئن ... العواطف دي موجودة دايمًا

فوق البيعة!

نجيب: البيعة؟ شوف برضه، ألفاظك مش عاجباني!

سامي (يصيح): وبعدين بقى ... انت حاططير لي برج من عقلي ... جاتك البلا ...

سمح! أنا مش ضروري أعجبك انت ... أنا ما دمت عاجب فيفي طظ في حضرتك، وفي

الدُّنيا كلها!

نجيب (يطرق): أنا كل قصدي انك تعجبها!

سامي: عاجبها غصب عنك!

نجيب: دا المهم ... (صمت ... ينهض ويتّجه إلى الجرامفون ليدير الأسطوانة).

سامي: بلاش فونوغراف دلوقت ... اعمل معروف، خلّينا نتكلم شوية!

نجيب: عاوز منّي إيه كمان؟

سامي: ولا حاجة!

نجيب: طيب خلاص بقى اعتق رقبتني!

سامي: ما تخافش ... خلاص عتقتك ... أنا كان غرضي أسألك عن أحوالك انت!

نجيب: أحوالي أنا عال قوي ... كتر خيرك!

سامي: على فكرة ... السّت الي كنت قابلتها في جروبي بتاكل جلاس، ووقعت في حبّها! ما فيش خبر عنها أبداً؟

نجيب: لا!

سامي: أنا متأسّف اني غرقان لشوشتي في مسألة فيفي، زي ما انت شايف ... والّا أنا كنت حالاً شفت لك طريقة!

نجيب: ممنون!

سامي: وأحوالك الماليّة ماشية؟

نجيب: أحوالي الماليّة فتحت بصعود ٥ بنط، وقفلت بنزول بنطين!

سامي: هيّ إيه؟

نجيب: البورصة!

سامي: بورصة إيه؟

نجيب: أعمل لك إيه؟ حضرتك بتسألني إذا كانت أحوالي الماليّة ماشية؟ أقول لك إيه بس؟ شيء يجنّن! تاجر أقطان أنا في بورصة مينا البصل؟! من امتى كان لي أحوال ماليّة، ماشية، والّا قاعدة؟

سامي: أنا غرضي أسألك عن الحجز المتوقّع على عفشك، لسّه ماشي والّا.

نجيب: طبعا ده ماشي ... امّال حايروح فين؟

سامي: وامتى تحدّد يوم البيع؟

نجيب: ما اعرفش ... اسأل عبد الله البوّاب ... هوّ الي تعيّن حارس!

سامي: على الله من هنا ليوم البيع، يجي لك قرشين.

نجيب: منين ييجوا القرشين ... ما دام ما انفتحت لناش الجيوب، ولا القلوب!

سامي: طبعا انت عارف ظروفك صعبة!

نجيب: جدّا.

سامي: على كل حال ربنا يفرجها من فضله.

نجيب: والله أنا في غاية الخجل من ربنا ... لأنّه سبق فرجها كثير من فضله!

سامي: (ينهض للانصراف): مش كثير عليه المرة دي كمان.

نجيب: انت قايم؟

سامي: أيوه ... علشان ورايا ميعاد.

نجيب: مع خطيتك طبعًا.

سامي: بالطبع مع فيفي!

نجيب: طيب ... مع السَّلَامَة.

(سامي يخرج بعد أن يحيي بإشارة.)

(نجيب ساهم بلا حراك لحظةً.)

عبد الله (يدخل ومعه ورقة): سيدي نجيب بك!

نجيب: أفندم.

عبد الله: النهارده كام في الشهر؟

نجيب (في ارتياح): ليه بقى الله لا يسيئك!

عبد الله: لأ ... ما فيش حاجة ... ما تخافش.

نجيب: ما انتش جايب وراك مصيبة النهارده؟

عبد الله: لأ ... ما فيش لا سمح الله مصايب ... واحنا ما لنا وما لها ... شر برّه وبعيد!

نجيب: آمال الورقة الي في إيدك دي إيه؟

عبد الله: لأ ... دي لسه ما جاش وقتها!

نجيب: الحمد لله.

عبد الله: رَوْق بال جنابك.

نجيب: أصل انت دايماً تيجي تطلّع على جتّي البلا، من غير مناسبة!

عبد الله: لأ ... خلاص ان شاء الله، ما يجيش على قدومي إلّا الخير.

نجيب: طيب يا سيدي ... عشمنا كده برده.

عبد الله: الغرض وما فيه ... أنا كنت عايز أقول لحضرتك!

نجيب: إيه ... إياك انت جاي طالب مني فلوس؟

عبد الله: برده ما أقدرش أكذب حضرتك في دي! لكن بقى!

نجيب: لكن بقى إيه؟ أنا كان أملي تطلّعني مرة كدّاب في دي.

عبد الله: على كلّ حال دي مسألة مش مهمّة دلوقت.

نجيب: أيوه كده اعمل معروف ... فُضْنَا من المسائل الي مش مهمّة! انت كنت طالع

ليه بالظبط؟

عبد الله: هو النهارده مش ١٢ في الشهر؟

نجيب: النهارده ١٤.

عبد الله (صائحاً): ١٤ في الشهر؟ يا خبر اسود!

نجيب (في هلع): اسود ازاى؟

عبد الله: النهارده مصيبة مستنظرانا، ولا احناش داريين!

نجيب: قلت لك كده، تقول لي ما فيش مصايب النهارده! إيه بقى يا سيدي قول ...

تكلم ... مؤتني ... هات خبري بالعجل!

عبد الله: المحضر، كان قال إن يوم البيع ١٤ الشهر ده!

نجيب: ١٤ أبريل!

عبد الله: جنبك مش عارف؟

نجيب: أعرف منين؟

عبد الله: أنا سلّمت لجنبك صورة من ورقة الحجز زي دي ... (يقدم الورقة).

نجيب: وانت فاهم اني لاقى نفسي، علشان اقرا محاضر حجز، وأفور دمّي، قبل

الميعاد؟

عبد الله: طيب خد جنبك استقرا الورقة دي، وشوف، يمكن احنا غلطانين.

نجيب: هات يا سيدي ورّيني ... (يتناول الورقة وينشرها ويقرأ الآتي):

محضر حجز تنفيذي ... إنه في يوم الأحد ٢ مارس سنة ١٩٣٢ م الساعة ١٠:٤٥

افرنكي صباحاً ... بناء على طلب الخواجات جبران سعد الله وإخوته، المتّخذين لهم

محلّاً مختاراً، مكتب حضرة فرغلي أفندي المحامي ... والاطّلاع على صورة محضر الحجز

التحفّظي، الرقيم ٧ فبراير سنة ١٩٣٢ م، المحكوم بتثبيته، وعلى الحكم الصادر غيابيّاً،

من محكمة مصر الأهلية، في القضية المدنيّة نمرة ٤٨١٦ سنة ١٩٣٢ م، المشمول بصيغة

التنفيذ والنّفّاذ، ومعلن قانوناً وموكلّ لنا بتنفيذه ... أنا عبد الحميد قرمان، محضر محكمة

مصر الأهلية، وصلت إلى شارع قصر النيل، وبمساعدة شيخ القسم، قد تواجدت بالمسكن

استئجار المدعى عليه نجيب أفندي إحسان، فلم أجده، ونبّهت على تابعه، بواب العمارة

عبد الله خميس، المقيم معه في معيشة واحدة، بدفع مبلغ ٥٦٨٠ قرشاً، قيمة المحكوم به،

والمصاريف وأتعاب المحاماة ... فأجاب أن المدعى عليه غائبٌ، ولعدم الدّفع، دخلت العين

المؤجّرة، وأوقعت الحجز التنفيذي على الآتي: عدد ١ ترابيزة وسط خشب أبيض بأربعة

أرجل مستعملة سليمة ... عدد ١ كنصول خرزان وعليه رخامة بيبضاوي سليمة ... عدد

١ بساط قطيفة مبرّد ٤ × ٥ ... عدد ٣ براقع ستاير خشب مشجّر بحلية قطيفة ... عدد

١٢ كرسي خرزان ببويه بُني؛ عدد ١ سرير خشب بلدكان ببويه بيضة، وعليه ملة خشب بسلك، وثلاث مراتب نوم بوجه تيل مقلّم حشو قطن، ومخذّتين نوم بوش ستانية أخضر، ولحاف ستانيه بمبه ... عدد ٤ حلال نحاس بغطاهم من فوق بعض وزن الجميع ١٥ رطل ... عدد ١ أنجر نحاس أربعة أرتال ... (نجيب يقطع القراءة ويلتفت إلى عبد الله في فرج) والصالون ده نسيوه؟

عبد الله: اَزَّاي؟ محجوز عليه برده ... استقرا جنابك زهر الورقة، تلاقي بقيّة القايمة.

نجيب (يقرأ): عدد ٦ كنبه وفوتيل وكراسي صالون ... عدد ٣ طاولة كبيرة وصغيرة ... وعدد ١ فوتوغراف ماركة جرامفون وعشر أسطوانات أفرنجية وعربية مستعملة سليمة ... (نجيب يقطع القراءة ويلتفت إلى عبد الله) حتّى الجرامفون والأسطوانات يا عبد الله؟ دول قشطونا تمام ... وجردونا وخربوا بيتنا.

عبد الله: استقرا ... استقرا ... لسه كمان.

نجيب (يقرأ): عدد ١ دولاب ملابس بضلفتين وبمرآة مصقولة سليمة ... عدد ٣٤ قطعة فقط لا غير، ولم نجد خلاف ذلك، ولعدم وجود ... (نجيب يلتفت لعبد الله) اَزَّاي ما وجدوش خلاف ذلك؟ بقي ده كل العفش؟!

عبد الله (يغمز بعينه): أصل أنا، كلام في سرّ جنابك، هرّبت الباقي ... التنايش الخفيفة.

نجيب: كنت بالمرة هرّبت العفش كلّ يا عبيط.

عبد الله: اَزَّاي أهرّبه؟ ده يبقى اسمه عزل ... وانا صنعتي هنا بواب العمارة ... أقوم أعزل شقّة بحالها، من غير علم صاحبها؟ وأعزل، حضرتك، فين؟

نجيب: النّهاية ... أهو المحضر هوّ الي عزلنا ... (يعاود القراءة) ... فقط لا غير، ولم نجد خلاف ذلك، ولعدم وجود من يقبل الحراسة؛ فقد عيّنت عبد الله خميس، بواب العمارة، حارسًا على جميع ما حجز عليه، وحذّرت بالقانون، وقبل الحراسة، وحذّدت لمبيع المحجوزات، يوم الاثنين ١٤ أبريل سنة ١٨٣٢م، من الساعة ٩ صباحًا لآخر النهار.

عبد الله: يعني النهارده.

نجيب (يستمرّ في القراءة): وحرّرت هذا المحضر، وتركت للمدين صورة، مخاطبًا مع تابعه عبد الله خميس، لغيايه، وسلّمت له صورة بصفته حارسًا.

عبد الله: وقال لي: إن ضاع جنس شيء، من الي مكتوب في القايمة، أروح أنا في الحديد.

نجيب: طبعًا.

عبد الله: لكن أَدَحنا بقينا العصر، ولا فيش حد جه باع ولا اشترى! يكنوش نسيوا؟

نجيب: ينسوا أزاى؟ طوّل بالك، دلوقت تتفرّج على بهدلتنا قَدَام الي يسوّا والي ما يسوّا!

عبد الله: وإيه العمل دلوقت؟

نجيب: مافيش عمل بالمرة.

عبد الله: بس لو كانش راح من بالي ان النهارده ١٤ في الشهر!

نجيب: يعني كنت حاتعمل إيه يا سي عبد الله؟ دا حتى أحسن الي راح من بالك ... على الأقل، علشان ما نزعش قبل الهنا بسنة ... فُضك بلا وجع دماغ ... دا أنا لو كنت اكدر خاطري علشان مسائل زي دي؛ كان زمني توفّيت بقالي ١٥ سنة، ومدفون النهارده في قرافة المجاورين (يتّجه إلى الجرامفون) اسكت لما اسمع الأسطوانة المدهشة، قبل ما ييجوا ياخدوا الفونوغراف!

عبد الله: لك حق ... جنابك فرفش ... ما حد واخذ منها حاجة!

(يخرج عبد الله ... نجيب يدير الأسطوانة التي أدارها في أول الفصل «لجوزفين بيكر»، ثم يتحرّك راقصًا على أنغامها، في قوّة وعدم اكتراث.)

(فيفي تدخل فجأة بعد لحظة؛ فترى نجيب يرقص وحده في الحجرة، على نغم الأسطوانة؛ فتقف باسمّة مشاهدة ... ويراها نجيب فلا يغيّر ما هو فيه ... ويظل يرقص، غير حافل بوجودها، وتسرّ فيفي من حركاته؛ فتجلس على مقعد أمامه تتفرّج ... ولا تتمالك أحيانًا من الضحك؛ لحركاته الفكاهية ... إلى أن تنتهي الأسطوانة؛ فيرفع نجيب الإبرة، وهو يصفر بفمه.)

فيفي (في ابتهاج): مدهش! أرجوك تعيد الأسطوانة دي كمان مرة.

نجيب (ينظر إليها من رأسها إلى حذاءها ولا يجيب).

فيفي (في امتعاض): بتبص لي كده ليه؟

نجيب: شيء جميل خالص!

فيفي: إيه هوّ الي جميل خالص؟

نجيب: أولًا، دخول حضرتك على طول كده، كأنها وكالة من غير بواب!

فيفي: كنت عايزني أضرب جرس الخطر؟ كان زمانك دلوقت، جواً الغواصة بقالك ه دقايق، في الحر ده!

نجيب: سيادتك مش غلطانة المرة دي في دور سامي؟

فيفي: لأ أبداً ... أنا عارفة إن دي الأبارتمان بتاعتك.

نجيب: طيب ... بقى، أنا أحب أعرف بسرعة، سبب التشریف.

فيفي: اسمع أمّا أقول لك، قبل كل شيء، انت يجب تغير بسرعة لهجتك دي، وتكلمني

بسرعة بشكل ألطف من كده، والأ، انا وحياء راس بابا، أجنتك وأوريك النجوم الضهر!

نجيب: وحياء راس ماما، أنا شايف النجوم الضهر والصبح والعصر وطول النهار

... ومش منتظر سيادتك دلوقت؛ علشان تورّيهم لي!

فيفي: ليه بقى؟ إيه اللي مزعلك؟

نجيب: فيه ألف سبب وسبب!

فيفي: ومع ذلك، أنا دخلت فجأة لقيتك مبسوط، بترقص على الجرامفون!

نجيب: الطير يرقص مذبوحاً.

فيفي: (في اهتمام): انت متألم من إيه؟ أرجوك تقول لي حالاً.

نجيب: أقول لك انت؟!

فيفي: إيه المانع؟

نجيب: مستحيل!

فيفي: مانتش واثق مني؟

نجيب: يا سيّدتى العزيزة ... أرجوك ترك الموضوع ده نهائياً، نتكلم في شيء مفيد؛

إن كان لا بد من الكلام.

فيفي: انت بتحب.

نجيب: شوفي انت ازاي حاتزعليني منك، وتخليني ابقى مش لطيف، ودمي يفور،

وأتكلم كلام فارغ كتير ... وبعد كده تحلفي ان انا اللي محقوق.

فيفي: طيب خلاص ... مش حاقول حاجة.

نجيب: انت كنت جاية علشان إيه؟

فيفي: كنت جاية علشان.

نجيب: أفندم؟

فيفي: علشان أوريك الشبكة، اللي قدّمها لي سامي ... خاتم عجيب! شوف ... (تريه

الخاتم وهو في إصبعها) فصّ واحد برلنت سوليتير.

نجيب: عجبك؟

فيفي: قوي ... قوي ... حاجة حلوة صحيح ... وذوق جميل صحيح.

نجيب: العقو يا فندم!

فيفي (تنظر إليه في دهشة)؟

نجيب (يستدرك): قصدي يعني بالنيابة عن سامي.

فيفي (صمت ... تتأمل الخاتم في أصبعها): سامي غني بالتأكد.

نجيب: أيوه طبعًا.

فيفي: هو كمان قال لي.

نجيب: قال لك إيه؟

فيفي: قال لي ان عنده ٦٠٠٠ جنيه في البنك، رايح يبني لي بهم فيلاً، في مصر

الجديدة.

نجيب (هازًا رأسه في تهكم خفي): ضربهم في ٦ على طول!

فيفي: وقال لي ان عنده أطيان، ما اعرفش فين.

نجيب: كمان؟ طبعًا.

فيفي: ويحبني قوي، تعرف؟

نجيب: عارف، وانت بتحبييه ... وكتب الكتاب، إمتى بقى؟

فيفي: ما اعرفش ... سامي عايز يكتبه من بكرة.

نجيب: له حق.

فيفي: لكن أنا مترددة شوية.

نجيب: ما لكيش حق.

عبد الله (يدخل): سيدي نجيب بك.

نجيب: خير.

عبد الله (ناظرًا إلى وجود فيفي): دا ... أقول؟

نجيب: قول ... خد راحتك.

عبد الله: المكوجي طالب حسابه.

نجيب: وانت ما عندكش لسان ترد عليه؟

عبد الله: ما أمكنيش أبدًا ... غلب حماري ويّاه.

نجيب: وعاييز ضروري تغلّبني أنا كمان ويّاكم؟ حسابه كتير؟

عبد الله: بقى له شهرين ما قبضش أبيض ولا اسود.
نجيب: أعوذ بالله ... وكان ساكت ليه لغاية دلوقت؟
عبد الله: إنسانية منه.
نجيب: وجرى لها إيه الإنسانية دي النهارده؟
عبد الله: لقي ما فيش منها فايده.
نجيب: وإيه اللي تشوفه انت دلوقت؟
عبد الله: يجي يحاسب جنابك.
نجيب (كالمرتاح): يحاسبني؟
عبد الله: ما فيش غير كده.
نجيب: أنا عملت لك حاجة يا عبد الله؟ زعلتك النهارده في شيء؟ متأثر مني؟ بينك وبينني ضغائن؟ فهمني اعمل معروف.
عبد الله: أنا فاهم ... جنابك تكره الحساب ... لكن ما باليد حيلة.
نجيب: يا سلام وسلم ... الحساب ده، نهرب منه أزاى؟
عبد الله: حساب المكوجي؟
نجيب: الحساب على وجه العموم ... الأرض فيها حساب ... ننزل القبر، نلقى فيه حساب ... نطلع السما، نلاقى فيها حساب ... وانا في كل حنة ... ما فيش فايده أبداً.
فيفي (تضحك ضحكة خفيفة).
نجيب: روح يا شيخ، قول للمكوجي دا يبرد شوية.
عبد الله: ما يرضاش يبرد إلا لو قبض.
نجيب (صائحاً): قل له يجي يقبض روعي بقى، لأنني لا أملك غيرها النهارده!
وتفضل من غير مطرود، يا بواب يا مغفل، قبل ما اعوجج لك خلقتك بأسطوانة من دول، وزى ما ترسى ... (نجيب يمسك أسطوانة ... عبد الله يجري خائفاً).
(فيفي تكتم ضحكها).
نجيب: شيء يقصر العمر ... (يعود إلى قريها).
فيفي: هدي نفسك شوية.
نجيب: ما يمكنش ... أهو أنا، ما يمضي على نصف ساعة على خير أبداً ... لا بد من خبر مزعج.

فيفي: يظهر ان ماليتك مرتبكة شوية.

نجيب: شوية؟! انت متواضعة قوي!

فيفي: طيب ما تيجي نفكر في تنظيم ماليتك.

نجيب: ما تتعيبش نفسك.

فيفي: ليه؟

نجيب: لأن لو جميع وزراء مالية العالم اجتمعوا في لوزان، وعملوا مؤتمر لتنظيم ماليتي، وتسوية ديوني، زي مؤتمر نزع السلاح، وديون الحرب، أوكد لك، انهم يمكن ينجحوا في نزع السلاح وديون الحرب، ولا ينجحوش في مسألتني ... عاوزة إيه بقى أكثر من كده!

فيفي: للدرجة دي؟

نجيب: دي مسألة مش محتاجة لمناقشة.

فيفي: ليه؟ ماهيتك كام؟ ولو ان ده تطفل مني ... لكن أنا مهتمة، وأحب أجرب، يمكن أنجح، أحسن من مؤتمر لوزان.

نجيب: ماهيتي خمسين جنيه في الشهر، اسمًا ... لكن الي بيوصل في يدي ٤٤ جنيه و٦٠٠ ملّيم، بعد الاحتياطي والمعاش ورسم الدمغة وخلافه، من تماحيك آخر الزمن!

فيفي: وبتصرف منهم كام في الشهر؟

نجيب: باصرف منهم حوالي ١٠٠ جنيه في الشهر!

فيفي: (في دهشة): ازاي ده؟ إيرادك خمسين وتصرف ١٠٠؟

نجيب: باستمرار، من نهار ربنا ما خلقني ... علشان كده المسألة عويصة، ولا يمكنش حلها، إلا إذا اخترعوا حساب جديد، يمشي بالمقلوب، غير الحساب الي أوجده فيثاغورث.

فيفي: وتصرف ال ١٠٠ جنيه ازاي في الشهر؟

نجيب: ما أقدرش أقول لك ... أنا لما يكون في جيبني فلوس، ما احترمهاش ... أصرفها بعقل ومن غير عقل ... يمكن ألاقى شحات في السكة، أعطيه ورقة بجنيه؛ لأنه قال كلمة عجبتني.

فيفي: انت مدهش.

نجيب: أنا إنسان، مكتوب عليه انه يعيش بشكل مخصوص في الحياة، ويستحيل تتغير حياته، يستحيل يعيش يوم في أمان الله، زي بقية مخاليق الله الطيبين!

فيفي: حياة بوهمية غريبة!

نجيب: ارتباك مزمن، وعسر هضم اقتصادي، وفقر دم مالي، مالهش علاج.
فيفي: انت غلطان ... أفكر ان فيه علاج.

نجيب: إيه هو من فضلك؟

فيفي: لو تتزوج واحدة تفهمك، ويكون عندها فلوس.

نجيب: ويكون عندها (باكار).

فيفي: تمام كده.

نجيب: علشان ينباع الباكار ... ونغرق احنا الاثنين في نهار!

فيفي (باسمة): وماله؟

نجيب: أظن واحد زيي، ما انخلقش علشان زواج.

فيفي: تفكر كده؟

(جرس الباب يدق بشدة.)

نجيب: جرس الخطر! (يتحرك، ويسرع إلى المنضدة، ويرفع غطاء الصندوق، ويلتفت إلى فيفي) عن إذنك دقيقة واحدة.

فيفي: حاتدخل الغواصة؟ دي مش طريقة عملية أبدًا.

نجيب: دا اختراع ألمانى! مستحيل أقدر أبص في سحنة مطالب ... أورفوار مؤقتًا ... (يغلق عل نفسه الصندوق).

عبد الله (من الخارج): يا حضرة المحضر، باقول لك نجيب بيه مش موجود.

المحضر (يدخل وخلفه خواجة، وشيخ القسم، وعبد الله): وجود المدين وعدم وجوده، ما يهمنىش ... (لشيخ القسم) نادى الشّيّاين.

شيخ القسم (يتّجه إلى الباب وينادى): اطلع يا شّيّاال انت وهوّ!

المحضر: قبل مانشرع في التنفيذ، أنّبّه عليك يا عبد الله خميس، بصفتك تابع للمدين، ومقيم معه في معيشة واحدة، بأن تدفع لدينا حاليًا، مبلغ ٥٦٨٠ قرشًا، واحنا نوقّف الإجراءات ... تدفع والّا لأ؟

عبد الله: لأ ... منين؟ هو احنا معانا خمسة ملّيم.

الخواجة (وهو يتكلّم بلغة واضحة سليمة، مع عجمة خفيفة): أنا عندي تفويض

من الدّاين الخواجة جبران، لو تدفع أربعين جنيه، يصير التنازل عن الحجز والبيع.

عبد الله (ينظر إليه، ولا يعنى بالردّ عليه، ويلتفت للشّيّاين): شيل شيل يا شّيّاال.

المحضر: تابع المدين أجاب بعدم السداد، وشرعنا في التنفيذ ... تعال يا عبد الله خميس، بصفتك حارس للمنقولات، قدّم لنا المحجوز عليه.

عبد الله: آهو عندك.

المحضر (محتدًا): آهو عندي ازّاي، يا قليل الأدب، يا حمار! انت مش عارف أنا مين؟ فتّح عينك كويّس، وكلّمني باحترام ... أنا حامي القانون، وممثّل سلطة الحكومة، انت فاهم إيّه! وشرف مركزي، أعتبرك مبدّد، وأحرّر ضدّك في الحال، محضر تبديد وتعدّي، وأحط الحديد في إيدك، وأضيع مستقبلك.

عبد الله: لأ ... مفيش لزوم ... أنا غلطت، والشفاعة لشيخ التمن.

شيخ القسم: استسمح حضرة المحضر، وابقى خد بالك يا بني، ألا تنضر. (للمحضر) أصله مش واخذ على مقابلة الحكّام.

المحضر (في عظمة): الحق علينا الي عيّناه حارس ... ضيّع وقتنا، واحنا لسّه ورانا بيوع وحجوزات وانتقالات.

عبد الله: يا جناب المحضر، العفش تمام، ما ضاعش منه قشاية.

المحضر (يعطي المحضر لشيخ القسم): خد يا شيخ القسم، صورة محضر الحجز، واجرد وطابق القائمة. (يجلس على مقعد) ألا احنا تعبانين من كثرة الأعمال ... اتفضّل استريّح يا خواجه يوسف.

الخواجه يوسف (ينظر إلى فيفي الجالسة المتفرّجة في ابتسام): بردون يا مدام. **فيفي (للخواجه):** من فضلك، ما يمكنش تأجيل البيع لبكرة، واحنا ندفع كل الفلوس؟ **المحضر:** ما يمكنش يا هانم، تأجيل البيع يتكلّف مصاريف، ويستدعي إعادة اللصق والنشر وكافة الإجراءات، ودي ماطلات احنا عارفينها.

فيفي: متأسّفة، ما فيش في شنطتي ٤٠ جنيه دلوقت ... إنّما أقدر.

شيخ القسم (يقرأ ببطء في الورقة): عدد ١ تربيذة وسط خشب أبيض بأربعة أرجل مستعملة سليمة ... فين؟ (يلتفت حوله) مش موجودة.

عبد الله: دي في المطبخ ... مش موجودة ازّاي؟ أجرد الأوده دي، الي انت فيها، الأول، تلاقي كل شيء تمام.

المحضر: أيوه، أجرد أوده أوده، والشياطين تنزّل أول بأول، والنقص يتحرّر به محضر.

شيخ القسم (يقرأ): عدد ٦ فوتيل وكراسي وكنبة ... عدد ٣ طولة وفنوغراف إلخ ... (ينظر بعينيّه مطابقًا) الأوده دي تمام، انزل بها يا شيال انت وهوّه.

عبد الله (لشيخ القسم): حاتاخد العفش على فين؟
الشيخ: على باب الشارع، بنرص حَتَّة حَتَّة، علشان الناس تجي على ضرب الجرس،
تدخل المزاد.

عبد الله (يهزُّ رأسه آسفًا): يا فضيحة جنابك يا سي نجيب بك!

(ينهمك الشيَّالون في زحزحة الكراسي، وتغيير نظام الصالون، ونهض المحضر
والخواجة يوسف؛ ليدعا الشيَّالين تنقل مقعديهما، وتظل فيفي جالسةً، إلى أن
يدنو منها شيَّال يريد نقل مقعدها.)

المحضر: تفضِّلِي يا هانم الناحية دي ... في الرِّوَاقة.

(وتقف بجوار المنضدة التي فيها نجيب ... ولكن لا يلبث أن يأتي الشيَّالون
لنقل المنضدة؛ فتصيح فيفي ممانعةً.)

فيفي (صائحة): انتظر يا شيَّال ... انت واخذ الصندوق ده على فين؟

المحضر: دا من ضمن المحجوزات يا هانم.

فيفي: مستحيل! ده فيه جوَّ حاجات غير محجوز عليها طبعًا؟

المحضر: محجوز عليه يا هانم ... من فضلك ماتعرقليش التنفيذ ... شيل يا شيَّال.

فيفي (صائحة): مستحيل ... مش معقول ... لازم تسيب الصندوق ده.

المحضر: ما يمكنش يا هانم.

فيفي: أنا مستحيل أسمح بنقله.

المحضر (في غلظة): شيل شيل يا شيَّال ... بلاش عطلة.

الخواجة: تقدري يا مدام تدفعي كام، من أصل المبلغ؟

فيفي: أنا متأسَّفة ما فيش معايا النهارده فلوس كفاية. (فجأة) اسمع لما أقول لك

أنا أقدر أعطيك ده (تخلع الخاتم من إصبعها) إيه رأيك؟ تمنه بالتأكيد أكثر من مبلغك!

الخواجة (في دهشة يفحص الخاتم): خاتم ألماس (يخرج من جيبه عوينه، ممَّا

يستعملها الجواهرجيَّة للفحص، ويضعها على عينه، وينظر إلى الخاتم) طبعًا دا يساوي
كثير.

نجيب فجأة يرفع الغطاء، ويظهر صاحبًا، بين دهشة وارتياح الجميع: إنت مجنونة؟!

هات الخاتم ده يا خواجة!

المحضر (بعد لحظة وجوم): بسم الله الرحمن الرحيم ... طلع منين ده؟
شيخ القسم: دا لازم المدين.

(المحضر والشيخ يستعلمان من عبد الله، الذي يشرح لهما همساً.)

نجيب: الخاتم ... هات الخاتم يا خوجة اعمل معروف.
الخوجة: بردون يا بيه!

(ينظر إلى فيفي، التي سلّمت إليه الخاتم.)

نجيب: ما فيش بردون.
فيفي: اسكت يا نجيب، مالکش دعوى! خَلِّي الخاتم معاك يا خوجة.
نجيب: اَزَّاي الكلام ده؟ دا خاتم ألماس مش لعب.
فيفي: عارفة انه خاتم ألماس مش لعب ... وعاوزة اتصرّف فيه، أرميه البحر ...
الخاتم بتاعي أنا ... انت شريكي!
نجيب: بتاعك اَزَّاي؟!
فيفي: باقول لك اسكت يا نجيب ... انت ما لكش دعوى!
نجيب: ما ليش دعوى اَزَّاي؟ أَمَّال مين الي له دعوة؟ دا شيء يجنن! هات الخاتم يا خوجة.

فيفي: ما تسمعش كلامه يا خوجة ... زي أنا ما قلت لك، خَلِّي الخاتم معاك، وبكرة
أجيب لك مبلغك، على شرط توقّف البيع حالاً.

الخوجة: بكل ممنونيّة يا هانم ... يا حضرة المحضر، أنا طالب إيقاف البيع.
المحضر: انزل يا شَيَّال انت وهَوّ (يتناول ورقة ويكتب) محضر إيقاف (ثمّ يكتب في
صمت ويقول) أوقفنا الإجراءات؛ كطلب وكيل الداين، تعال امضي يا خوجة يوسف.
الخوجة (يوقّع على ورقة المحضر، ثم يخرج ورقة من جيبه، ويكتب إيصالاً يقدّمه
لفيفي): مرسى يا هانم ... آدي وصل بخاتم الماس فص واحد برلنت سوليتير وزن ٨
قراريط.

نجيب (بسرعة): تسعة ونصف ... (فيفي تنظر إليه والجميع في استغراب؛ فيستدرك
بسرعة) ... أيوه ... أنا عارف من سامي.

يوسف (وهو يكتب): تسعة قراريط ونص ... (يسلّمها الورقة) أورفوار ... أورفوار
يا نجيب بك ... (يخرج).

نجيب (يضرب أخماسًا لأسداس): أمّا يا ناس دي عجيبة!
المحضر: نهاركم سعيد يا حضرات ... (يخرج خلف الخواجة يوسف، ومعه شيخ القسم).

عبد الله (خارجًا كذلك خلف المحضر): اخلي طرفي يا جناب المحضر ... الحكومة حرّستني على العفش، وطلع لله الحمد سليم (يخرج مع الجميع).
فيفي (وحدها مع نجيب): عجيبة ليه بقى؟! حاجة طبيعية خالص ... كنت منتظر اني أسبيهم ياخدوك في الصندوق، ويبيعوا فيك ويشترّوا، كأنك محجوز عليك انت كمان ضمن الموبيليا؟

نجيب: وما له؟! لكن الخاتم.
فيفي: في داهية الخاتم ... إيه يعني الخاتم؟ أدفعه فدية، بصفتي من الحلفاء، أحسن ما كانوا يصادروا الغوّاصة بالي فيها؟!

نجيب: غوّاصة إيه؟! إحنا خسرنا الحرب!!
فيفي (ضاحكةً): أبدًا ... بالعكس.
نجيب: إيه اللي كسبناه؟

فيفي: كل حاجة ... أنا مندهشة، ليه تهتم بالخاتم بالشكل دا؟!
نجيب: بس علشان ده ... شبكة سامي.

فيفي: وإيه يعني؟
نجيب: طيّب، ورايحة تقولي لسامي إيه؛ لو سألك النهارده على الخاتم؟
فيفي: أقول له على اللي حصل.
نجيب: ما يصدّقش.

فيفي: جاز ما يصدّقش ... لأن سامي مش زيّك أو زيّي ... دي عقليّته ما تقدرش تفهم بسهولة التصرفات دي.

نجيب: لأنّه رجل عاقل موزون.
فيفي: زيادة عن اللزوم ... ولذلك، أنا رايحة أكلمه كلام شديد.
نجيب: حاتقولي له إيه؟

فيفي: حأقول له أنا مندهشة، ازّاي واحد صاحبك، ساكن معاك في بيت واحد، ينحجز عليه وانت ساكت؟!

نجيب: حايعمل لي إيه؟ كل واحد عنده ظروفه.

فيفي: اسمع يا نجيب، انت إمّا مغفل — ما تأخذنيش — وإمّا عاوز تدافع قدامي عن سامي، دفاع ما يستحقّوش ... انت بالتأكيد، تفهم سامي أكثر منّي ... لأنّي فهمت طبيعته كويس قوي من مدّة بسيطة.

نجيب: أنا أشهد لك دايماً بالذكاء ... إيه بقى الي فهمتيه؟
فيفي: فهمت انه رجل عاقل، زي ما قلت انت تمام، ويوزن كل حاجة في الدنيا، زي طبيعة كل شخص مادّي شوية.

نجيب: إيه كمان؟!
فيفي: أنا أفهم كويس الناس المدهونين بوية. سامي مدهون بوية كويس قوي.
نجيب: كل الناس كدا.

فيفي: انت لأ.
نجيب: ليه بقى؟ أنا يعني الي خشب أبيض، زي طراييزة الوسط؟ المسألة ان ظروفي غير ظروف سامي ... وأنا لو كنت لقيت فيه فايده، كان زمني ضربت نفسي بوية بالزيت ... ثلاث ... اربع اوشاش.
فيفي: ما افتكرش.

نجيب: على كل حال ... بعد الزّواج، في إمكانك تخلفي سامي خلقه جديدة.
فيفي: أنا مش عاوزة أخلقه، ولا أسخطه.
نجيب: عاجبك زي ما هوّ كده، ما فيش بأس.
فيفي: أرجوك ... بس ... كفاية ... احنا تكلمنا عن سامي زيادة عن اللزوم ... كلّمني عن موضوع تاني ... كلّمني عن نفسك.
نجيب: أكلمك عن نفسي أقول إيه؟ (يشير إلى الصالون المبعثر) آدي انت على إيدك، شايفة كل حاجة.

فيفي: حقاً ... صحيح، انت الشخص الوحيد، الي أقدر أقول انه ما حاولش لحظة، انه يغشني.

نجيب: انت لطيفة قوي معاينة النهارده، من غير مناسبة! بس ضيّعت الخاتم، لكن بقى الأمر لله! الكلام دلوقت أصبح ما يجيش منه.

فيفي: ما لكش دعوى بالخاتم ... اسمع يا نجيب! انت نسيت الطّب الرّوحاني والسحر العجيب؟

نجيب: مش فاهم غرضك.

فيفي: انت مش تعرف تقرا اللي في ضميري؟
نجيب: أبدًا.

فيفي: ازاي؟ مش فاكرك لما تقابلنا أول مرة في العيادة؟
نجيب: آه! لأ... أرجوك تنسي المقابلة دي، واللي حصل فيها.
فيفي: انت عبيط! أنساها ازاي؟ انت ما تقدرش تطلب مني طلب زي ده.
نجيب: انت حرة... لكن أنا أنسى زي ما يعجبني ...

فيفي: لأ... ما تنساش يا نجيب... أرجوك!
نجيب: عجائب! انت كمان عاوزه تحجزي على ذاكرتي!
فيفي: أيوه عاوزه أحجز.

نجيب (بعد لحظة): وإيه بقى اللي يهَمُّك من كذا؟
فيفي: ما تعرفش إيه اللي يهَمُّني؟
نجيب: أبدًا.

فيفي: ما تقدرش تقرالي اللي في قلبي وضميري دلوقت؟
نجيب: في ضميرك، انك قاعدة تمكّري عليّ، وتلعبى بمهارة مخيفة.
فيفي (باسمة): كَدَاب!

نجيب (مستمرًا): في ضميرك، انك عاوزه ترجّعي في نفسي أمل بسيط، من غير لزوم،
علشان في الآخر، أقع من سابع سما لسابع أرض، زي الدُورق الفخّار، اللي يقع من فوق
السطح على الأسفلت.
فيفي: كَدَاب.

نجيب: في ضميرك، انك بتحبّي شخص كويس قوي، وهو بيحبك كتير قوي.
فيفي: والشخص ده، موجود هنا، في الأوده دي، دلوقت؟
نجيب: بالطبع لأ.
فيفي: كَدَاب.

نجيب (في دهشة): كَدَاب؟!
فيفي (في إخلاص): من غير شك، كَدَاب، لو تفتكر ان الشخص ده، مش موجود هنا
دلوقت قَدَامي!

(نجيب ينظر إليها في صمت، وكأنه يغالب نفسه، ثم يطرق مفكرًا.)

(فيفي تُطرق في انتظار جوابه بصبر نافذ، ثم ترفع رأسها؛ كي تقول شيئاً؛ لإخراجه من صمته.)

نجيب (يرفع رأسه أخيراً إليها): متشكّر على التصريح الخطير ده!

فيفي (في امتعاض): بس كده؟!

نجيب (في عزم): بس كده!

فيفي: دا كل اللي تقدر تقوله؟!

نجيب: كفاية.

فيفي (في يأس): أنا كنت منتظرة، انت حتقول كلام كثير!

نجيب: متأسّف قوي ... أنا صحيح في شدّة التأثّر من تصرّحك، لكن بقى.

فيفي: لكن بقى إيه؟

نجيب: لكن بقى ... إيه قيمته دلوقت؟ تفتكري حيغّر إيه من الموقف كلّ.

فيفي: فهمت قصدك ... انت جنتلمان زيادة عن اللزوم.

نجيب: أرجوك تطلعي فوق لخطيبك، وتسحبي تصرّحك.

فيفي: مش عاوز بأي حال من الأحوال تقبله منّي؟

نجيب: فات الأوان!

فيفي (بعد لحظة): ضميرك مش قادر يسمح لك، انك تاخذ من صديقك خطيبته ...

مهما كانت الظروف، مش دي كل المشكلة، اللي قايمة في نفسك؟

نجيب (مطرقاً كالمخاطب لنفسه): أيوه، مهما كانت الظروف.

فيفي (في تأثّر): نجيب.

نجيب (في عزم): الوداع يا فيفي! (يتناول يديها، ويضغط عليهما في حرارة وإخلاص

... ثم يشيّعها إلى باب الشقّة، ثم يعود وحيداً وهو مطرق، يمشي في بطاء، ويقف في وسط

القاعة بلا حراك لحظة، ثم يرفع رأسه فجأةً ويقول): وانا وش زواج؟ أنا رد حجوزات! (ثم

يتجّه إلى موضع الجرامفون، ويدير الأسطوانة، ويصغي إليها قليلاً شارداً الفكر ساهماً، ثم

يتحرّك فجأةً، راقصاً على أنغامها، كأنّما يريد أن يقنع نفسه، بأن حياته هي دائماً حياته

... وأنه لم يتغيّر في حياته شيء).

